

RI K'ISB'AL UWUJ RI XWAN

Keb' oxib' tzij puwi' ri wuj Apokalipsis

Ri chomanik k'o pa ri wuj Apokalipsis junam ruk' ri uchomanik ri Xwan. We wuj ri' kuq'alajisaj che ri Xwan man k'o ta pa ri rulew rumal rech che xk'am ub'ik pa jun ch'aqap ulew k'o pa ri polow che ub'i Patmos; xk'am ub'ik rumal ri ukojonik chrech ri Kristo.

Pa ri K'ak' Chapab'al Q'ab', man k'o ta chi jun wuj tz'ib'atalik jacha ri Apokalipsis, xuwi' k'o jujun taq kapitulo pa ri Utzalaj Tzij che xas loq' ne' kab'ix Apokalipsis chrech.

Pa ri Nab'e Chapb'al Q'ab' (A.T), kajunamitaj ruk' ri Apokalipsis, nik'ak taq kapitulo pa ri Eseki'el, pa ri Sakari'as e ronojel ri uwuj ri Dani'el.

Ri Apokalipsis, jun tzij che ri ucholajil kub'ij "q'alajisanik". We q'alajisanik ri' kaq'alajisaxik ruk' taq wachib'al. Rajawaxik che kach'ob'ik jas kub'ij we jetaq wachib'al ri'. Ri Apokalipsis sib'alaj kukoj nik'aj taq tzij rech ri Nab'e Chapb'al Q'ab' e xoquje' kukoj ri jetaq chomanik che kuch'a' ri Uq'ij ri Yahweh. Chiwila' Am 5,18: *"jAyum kech ri', ri winaq che keye'm ri Uq'ij ri Yahweh! ¿Jas iwech chrech ri Uq'ij ri Yahweh? Q'equ'mal we jun q'ij ri', man k'o ta q'ij."*

Ri Komon Tyox kareye'j ri Upetik ri Kristo, k'atek'ut xk'ulmatajik jun nimalaj oqatal rij ri Komon Tyox. Ri wuj Apokalipsis are kraj kuya' kichuq'ab' ri winaq ek'o pa ri Komon Tyox.

Pa ri kapitulo 1-3 k'o wuqub' wuj xtz'ib'ax chkech ri jetaq komon tyox ek'o pa ri Asia. Chuwach chi apanoq weri' are kamajitaj utzijoxik ri jetaq wachib'al kaq'alajinik pa ri kaj. Ri Jesus are ri jun alaj chij che ch'oltajinak chik e che xya'taj ri Kowinem chrech. Ek'o sib'alaj winaq che kekolotajik rumal ri Are'. Chiwila' 14,1: *"K'atek'uri', ri Alaj Chij xuk'ut rib' chuwach taq ri nuwoq'och; ri are' tak'al puwi' ri juyub' Si'on, ruk' 144,000 winaq che k'o ri ub'i' ri Are' e ri ub'i' ri Utat cho ri ukursal kupalaj."* We numero 144,000 sib'alaj k'o ri kub'ij.

Pa ri 18,1-19,10 chila' kariqitaj wi ri K'ax kape puwi' ri Bab'ilonia. Ri B'abilonia are' ri jun wachib'al che che kuk'utu ronojel ri itzelal k'o cho ri uwachulew. Chiwila' ri jetaq tzij kab'ix puwi' ri B'abiloni'a pa ri kiwuj ri Eq'axal Utzij ri Dyos, chiwila' b'a' ri kub'ij ri Jeremi'as pa ri kapitulo 50-51.

Pa ri 19,11-20,15 katzijox jun nimalaj ch'o'j kab'antaj pa kaj arech kach'akan ri Utzil puwi' ri Itzelal. Pa ri kapitulo 21-22 katzijox jun k'ak' kaj e jun k'ak' uwachulew, xoquje' katzijox jun k'ak' Jerusalem che kaqaj uloq chikaj.

RI K'ISB'AL UWUJ RI XWAN

Ri uq'alajisanik ri Jesus Kristo

¹Ri uq'alajisanik ri Jesus Kristo: ri Dyos xuya chech, arech kuk'ut chkiwach ri e'upataninelab', ri jas uwach che kpe kamik; ri Are' kutaq uloq ri anjel rech Are', arech ri are' kub'ano che kreta'maj ri upataninel Axwan, ²ri are' che kub'ij ri qastzij Utzij ri Dyos e ri ub'im ri Jesus Kristo: ronojel ri xrilo ri are'. ³Utz rech ri jun che kusik'ij e ri winaq che kkitatab'ej we tzij ri' je' jas tzij rech q'axeb'al utzij ri Dyos e we kna'tisaj pa ri kanima' ri tz'ib'atal chupam, rumal rech che chi uchanim chik, naqaj chik k'o wi ri kajb'al!

Nimalaj Toq'ob' e ja'maril

⁴Ri Xwan chkech ri ewuqub' Komon Tyox rech ri Asi'a. Nimalaj Toq'ob' e ja'maril xya chiwech rumal: «Ri are Are', ri are Are' Iwir, ri are Are' che kpe na ri'», kumal ri ewuqub' uxlab'al che ekanajinaq chuwach ri Utem, ⁵e rumal ri Jesus Kristo, ri utzalaj q'ataltzij, ri nab'e'al chkixo'l ri ekaminaqib', ri nimalaj kinimal ri e'ajawinel rech ri uwachulew. Ri kujuloq'oq'ej e ri uch'ajch'ob'em ri qamak rumal ri ukik'el, ⁶ri ujub'anom, uj jun ajawib'al kech chuchqajawib' chuwach ri Udyos, chuwach ri Utatxel; chech ri Are' ri q'ijilanem, ri kowinem chub'eq'ij chub'esaq. Amen!

⁷Chi kamik ri' petinaq uloq chuxo'l ri taq sutz'; ronojel winaq kril na uwach ri' ri are', xoquje' kril uwach ri are' che xuq'axej chi ch'ich', k'atek'uri', konojel ri ejuq'at winaq chuwachulew, kk'is kik'ux ri' chuwach ri are'. ;Je' nak'uri'! ;Amen!

⁸In ri in Alfa e ri Omega kcha ri Ajawxel Dyos, «ri are Are', ri Are' Iwir, e ri Are' che kpe na ri'», ri Ajaw che rajaw ronojel jas uwach.

Ri Axwan pa ri Patmos

⁹Ri in, in Xwan, ri iniwachalal e ri iniwachi'l pa ri k'ax, pa ri ajawib'al e pa ri koch'onik pa ri Jesus. Ri in, in k'o pa ri ch'aaqap ulew pa ri Polow rech Patmos, rumal ri Utzij ri Dyos e ri ub'im ri Jesus. ¹⁰Ri in xinok, pa ri wuxlab'al pa ri uq'ij ri Ajawxel, k'atek'uri', xinta chwij in, jun ch'ab'al che kch'awik je' jas jun tum e kub'ij: ¹¹«Ri jas uwach che kawil ri at, chatz'ib'aj pa jun tz'ib'atalik wuj, arech, ri at kataq ub'ik chkech ri ewuqub' Ekomon Tyox: chech ri Efeso, chech ri Esmirna, chech ri Pergamo, chech ri Ti'atira, chech ri Sardes, chech ri Filadelfi'a, e chech ri La'odise'a».

¹²Xinsutij wib' arech kinwilo ri ch'ab'al che kch'aw wuk'; e aretaq chi' xinsutij wib', ri in xinwil wuqub' chajb'al rech q'an pwaq, ¹³k'atek'uri', pa ri unik'yajal, xinwil jun, che jacha Uk'ojol achi, ukojom jun roqorik ratz'yaq che ximitalik xe'upam ruk' jun ximb'al che q'an pwaq. ¹⁴Pa ri ujolom k'o saq taq uwi' je' jas ri saq rismal chij, je' jas ri chuntew; ri uwoq'och je' jas uxaq taq q'aq', ¹⁵ri raqan je' jas jun je'likalaj ch'ich' che ja'rinq e suk'umarinaq pa ri q'aq'; ri uch'ab'al je' jas uchojojeb'al ri nima'q taq ja'. ¹⁶Pa ri rikyaq'ab' uq'ab' k'o wuqub' ch'umil e pa ri uchi' kel uloq jun ch'ich' che kketenik ruk' ri keb' utzaltmal; k'atek'uri', ri uwachb'al, je' jas ri q'ij che sib'alaj kchuplinik.

¹⁷Aretaq chi xinwil ri are', xintzaq cho raqan jacha inkaminaq; k'atek'ut xuya ri rikyaq'ab' uq'ab' panuwi' e xub'ij: «Ma- xe'j awib', in ri in nab'e e in ri in k'isb'al, ¹⁸in ri in k'aslik, in ri xinkamisaxik we ukamik ri' in k'aslik chub'eq'ij chub'esaq, in ri k'o wuk' ri ulawib'al ri kamikal e ri Ades. ¹⁹Chatz'ib'aj b'a' ri jas uwach xawilo: ri chi je'wi kamik ri' e ri jas uwach che chi uchanim kpe na ri'. ²⁰Ri nimalaj awatalik chech ri wuqub' ch'umil che xawil pa ri wikyaq'ab' e ri wuqub' chajb'al rech q'an pwaq, are weri': ri wuqub' ch'umil e'are ri ewuqub' Anjelib' kech ri ewuqub' Komon Tyox; e ri wuqub' chajb'al e'are ri ewuqub' Komon Tyox.

I. Ri Efeso

²¹«Chech ri anjel rech ri Komon Tyox rech ri Efeso, chatz'ib'aj: Jewa' kub'ij ri are' che k'o ri wuqub' ch'umil pa ri rikyaq'ab' uq'ab', ri are' che kb'in pa kinik'yajal ri wuqub' chajb'al rech q'an pwaq. ²Ri in weta'm ri achak, ri akosik e ri akoch'onik; ri in weta'm che man katkowin taj ke'akoch'o ri e'itzel taq winaq; ri at ke'akoj pa ri k'ax ri e'are' che kkikoj kib' etaq'nelab' e ri at xariqo ri kijo'sil. ³Ri at k'o akoch'onik: ¿La man kakuy ta ri k'ax rumal ri nub'i' in, e la man xatkos taj? ⁴K'atek'ut, kinb'an q'atojtzij paw' rumal rech che kasach ri loq'oq'eb'al ak'u'x che k'o pa ri umajib'al kanoq.

⁵Chna'taj chawech ri k'olb'al jawi' attzaqinaq wi, chak'exa' ak'u'x e chachakuj ri nab'e achak. We man jeri' kab'ano, kinb'e na ri' awuk' arech kinjalk'atij ri uk'olb'al ri achajb'al, wa' weri', we man kak'ex ri ak'u'x. ⁶K'atek'ut, utz chawech che ri at kawetzelay kiwach ri enikolayitas, che xoquje' ri in kinwetzelay kiwach. ⁷Ri are' che k'o uxikin chutatab'ej b'a' ri tzij kub'ij ri Uxlab'xel chkech ri Ekomon Tyox: chech ri ch'akanel, kinb'an na arech kutij ri che' rech ri k'aslemal che k'o pa ri Para'iso rech ri Dyos.

II. Ri Esmirna

⁸«Chech ri anjel rech ri Komon Tyox rech ri Esmirna, chatz'ib'aj: Jewa' kub'ij ri Nab'e e ri K'isb'al, ri are' che xkamik e k'o jun k'ak' uk'aslemal. ⁹Ri in weta'm ri ak'axk'olil e ri ameb'a'il, kne'b'a', ri at, at q'inom, weta'm ri itzel taq tzij kech ri e'are' che e'ajjudi'os kecha che kib', ¿k'atek'uri' man e'ajjudi'os taj, xane' ejun sinagoga rech ri Satanas!

¹⁰Maxe'j awib' chech ri k'ax che ri kak'axk'olij na: kamik ri', ri k'axtok' ke'uk'yaq na ri' pa che' ejujun chiwech ri ix arech kixya'taj pa ri k'ax, k'atek'uri', ri ix kik'axk'olij na lajuj q'ij rech k'ax. Suk' chatk'oloq chi k'a pa ri kamikal, k'atek'uri', kinya na ri' chawech ri ketakik retz'b'alil ajolom rech k'aslemal. ¹¹Ri are' che k'o uxikin, chuta b'a' ri tzij kub'ij ri Uxlab'xel chkech ri Ekomon Tyox: Ri ch'akanel man kuxe'j ta rib' ri' chuwach ri ukab' kamikal.

III. Ri Pergamo

¹²«Chech ri anjel rech ri Komon Tyox rech ri Pergamo, chatz'ib'aj: Jewa' kub'ij ri Are' che k'o ri ch'ich' ruk' che kketenik ruk' keb' utzaltmal. ¹³Ri in, weta'm jawi' atkanajinaq wi ri at: jela' jawi' k'o wi ri utem ri Satanas. K'atek'ut, ko achapom ri nub'i' e man kawetzelay ta uwach ri nukojonik, kneb'a' pa taq ri uq'ij ri Antipas, ri suk'laj q'atal nutzij, che xkamisax pa ri itinimit, jawi' kanajinaq wi ri Satanas. ¹⁴K'atek'uri', chi k'o wi ri rumal katinyaj wi: ri at, e'ak'olom ejujun winaq chixo'l che kkito' ri utzij ri B'ala'am, ri are' che xuk'ut chuwach ri B'alak ri ukojik jun k'a'm chkech ri eralk'uwa'l ri Isra'el, arech kkitij ri ti'j rech tab'al toq'ob' chkech ri jo's taq e'esal uwach dyos, e kimakun kuk' taq ri edyose's

ri'. ¹⁵Xoquje' ri at ak'olom pa ri atinimit ejujun winaq che kkito' uwach ri kitzij ri enikolayitas.

¹⁶Chak'exa' b'a' awib', wema kak'ex awib', chanim kinb'ek arech kine'ch'ojinoq kuk' we winaq ri' ruk' ri ch'ich' rech nuchi'. ¹⁷Ri are' che k'o uxikin, chutatab'ej b'a' ri tzij kub'ij ri Uxlab'xel chkech ri Ekomon Tyox: chech ri ch'akanel kinya na ri' ri awatalik mana chech, e xoquje' kinya na ri' chech jun saq ab'aj, jun ab'aj che tz'ib'atalik jun k'ak' b'i'aj chuwach che man k'o ta jun winaq kch'ob'owik, xuwi' reta'm ri kk'amow ri ab'aj ri'.

IV. Ri Ti'atira

¹⁸«Chech ri anjel rech ri Komon Tyox rech ri Ti'atira, chatz'ib'aj: Jewa' kub'ij ri Uk'ojol ri Dyos che ri uwoq'och je' jas ujuluwik q'aq' e ri raqan che je' jas jun je'likalaj ch'ich'. ¹⁹Ri in weta'm ri achak: ri loq'oq'eb'al ak'u'x, ri akojonik, ri apatanajik, ri akoch'onik; are sib'alaj achak kamik ri' chuwach ri iwir kanoq. ²⁰K'atek'ut, katinyaj rumal rech, che ri at aya'om b'e chech ri Jesab'el, ri jun ixoq ri' kub'ij che ajq'atal utzij ri Dyos; ke'usub'u ri enupataninelab', arech kemakun kuk' ri edyoses aretaq chi' kkitij ri ti'j che rech tab'al toq'ob' chkech ri ejo's taq dyoses. ²¹Nuya'om keb' oxib' ik' chech arech kuk'ex ri uk'aslemal ri are', k'atek'ut, man kraj taj kuk'ex ri umak kuk' ri ejo's taq dyoses.

²²Je' nak'ut; ri in kink'yaq na wa' ri are' cho jun ch'at rech k'ax, xoquje' ri erachi'l che kemakun ruk' ri are', ke'ink'yaq na pa jun nimalaj k'ax we man kkik'ex ta ri kik'aslemal. ²³K'atek'uri', ke'inkamisaj na ri' ri eralk'uwa'l: rumal k'u wa' weri', konojel ri Ekomon Tyox kketa'maj na che ri in, weta'm kipam e ri taq kanima'; k'atek'uri' ronojel kintoj na ri' chiwech je' jas ri ichak, ²⁴k'atek'uri', ri ix che ix ajti'atira, che man k'o ta wa' we tzij iwuk' ri', ri ix che man iweta'm ta ri "najalaj kb'e wi ri ub'antajik ri Satanas", je' jas kkib'ij ri e'are', ri in kinb'ij chiwech che man kinkoj ta jun chi eqa'n piwi'; ²⁵xuwi kinb'ij chiwech, che ri jastaq uwach che k'o chi iwuk' ix, utzalaj uchapik chib'ana' chi k'ate' na kintzaliq uloq ri in. ²⁶Ri ajch'akanel, ri are', che utzalaj kinupatanij na chi k'ate' pa ri uk'isb'alil, kinya na ri' chech ri kowinem pakiwi' ri esiwanaq taq tinimit: ²⁷Kuk'am na kib'e ri' ruk' jun ch'ich' ch'ami'y e kub'an na ri' jeri' jas kipaxik ri jetaq b'o'j. ²⁸Je' nak'ut, ri in xink'am we kowinem ri' chi ruk' wi ri Nutat. E kinya na ri' chech ri are' ri ch'umil che rech ri aq'ab'il. ²⁹Ri jun che k'o uxikin, chutatab'ej b'a' ri tzij kub'ij ri Uxlab'xel chkech ri Ekomon Tyox.

V. Ri Sardes

³¹«Chech ri anjel rech ri Komon Tyox rech ri Sardes, chatz'ib'aj: Jewa' kub'ij ri are' che k'o ri wuqub' ruxlab'al ri Dyos ruk' e ri wuqub' ch'imil. Ri in weta'm ri achak; ri at je' jas atk'aslik, k'atek'ut, ri at atkaminaq.

²Chatk'astajoq, chaya'a' uchoq'ab' ri ak'aslemal, ri tu'qarinaq ak'aslemal! Jayi', pa ri ak'aslemal, man xinriq taj che sib'alaj nojinaq chuwach ri Nudyos. ³Chna'taj chawech jas uk'amik ri tzij xab'ano, chak'olo' b'a' pa ri awanima' e chak'exa' awib'. Rumal rech, che we ri at man katk'asi' ta che ri laq'ab'enik, ri in kinpe na ri' in je' jas jun elaq'om, k'atek'uri', man kaweta'maj ta ri' ri kajb'al aretaq chi' kinpe na paw'i' ri at. ⁴K'atek'ut, pa ri Sardes, ek'o ejujun awech ri at che man kixox'olob'isam ta ri katz'yaq; ri e'are' keb'in na ri' wuk' in ruk' saq katz'yaq, rumal che esuk'alaj taq winaq. ⁵Ri ch'akanel, kokisax ri' suk' saqalaj taq ratz'yaq, e ri ub'i', man kinchup ta ri' pa ri uwuj ri k'aslemal, kinq'alajisaj na ri' ri ub'i' chuwach ri Nutat e chkiwach ri e'anjel rech are'. ⁶Ri jun che k'o uxikin, chutatab'ej b'a' ri tzij che kub'ij ri Uxlab'xel chkech ri Ekomon Tyox.

VI. Filadelfi'a

⁷«Chech ri anjel rech ri Komon Tyox rech ri Filadelfi'a, chatz'ib'aj: Jewa' kub'ij ri jun che Tyoxlaj ub'antajik, ri Saqalajtzi, ri k'o ri ulawib'al ri David ruk': we kujaq ri are', man k'o ta jun ktz'apinik, e we kutz'apij ri are' man k'o ta jun kjaqowik. ⁸Ri in weta'm ri achak: Je' nak'ut, ri in xinjaq chawach jun uchi'ja' man k'o ta jun kkowin che utz'apixik, rumal rech, che ri at, kne'b'a' xa jub'iq' ri achoq'ab' k'olik, xak'ol ri nutzij e man xawetzela' ta uwach ri nub'i'.

⁹Chawilampe', kinb'an na che ejujun chkech ri ek'o pa ri sinagoga rech ri Satanas -ri e'are' che kkib'ij chi aq'an kib' che e'ajjudi'o, k'atek'uri' man e'ajjudi'o taj- ri in, kinb'an na ri', che ri e'are' kekixukab'a' na kib' chuwach ri awaqan at, arech kketa'maj che ri in atinloq'oq'em. ¹⁰Rumal rech che ri at, ak'olom ri nutzij che rech koch'onik; xoquje', ri in katink'ol na ri' pa ri kajb'al rech ri k'ax, ri k'ax che kpe na ri' puwi' ronojel ri uwachulew, arech ke'ukoj pa ri k'ax konojel ri winaq rech ri uwachulew. ¹¹Chi ukamik kinpetik: Ko achapik chab'ana' ri k'o awuk', arech man k'o ta jun winaq kelaq'an ub'i ri ketakik retz'ab'alil ajolom. ¹²Ri ch'akanel kinokisaj na ri' raqanja pa ri nim rachoch ri Nudyos; k'atek'uri', chi qastzij wi ri' man kel ta chi uloq e kintz'ib'aj na ri' chuwach ri ub'i' ri Nudyos e ri ub'i' ri utinimit ri Nudyos, ri k'ak' Jerusalem che kaqaj uloq chikaj chi ruk' uloq ri Dyos, xoquje' kintz'ib'aj chuwach ri k'ak' nub'i' in. ¹³Ri jun che k'o uxikin, chutatab'ej b'a' we tzij kub'ij ri Uxlab'xel chkech ri Ekomon Tyox.

VII. Ri La'odise'a

¹⁴«Chech ri anjel rech ri Komon Tyox rech ri La'odise'a: Jewa' kub'ij ri are' che are Amen, ri jun che suk'alaj ub'antajik, ri qastzij ilinel rech, ri Nab'e chuwach aretaq chi' ri Dyos xuk'iysaj xutik ri uwach ulew. ¹⁵Ri in weta'm ri achak: ri at, man at xu'w taj e man at miq'in taj. ¡Weta at xu'w on weta at miq'in!

¹⁶Je' nak'ut, rumal rech che ri at, at saqali'loj e man at miq'in taj e man at xu'w taj, ri in katinxab'ij uloq pa ri nuchi'. ¹⁷Ri at kachomaj: Kamik ri' ri in inq'inom, inq'inomarinaq, ronojel tz'aqat wuk', man k'o ta jun jas uwach kraj wuk'; ¡k'atek'uri', ri at man kawil taj: che ri at, at jun xu'yalaj winaq, at meb'a', at moy e at jun ch'analikalaj winaq! ¹⁸Katinpixb'aj ukoq, kinb'ij chawech, chaloq'o b'a' pa ri awachoch ri utzalaj q'an pwaq ri k'atisam pa ri q'aq' arech ri at katq'inomarik; chaloq'o' ri saq atz'yaq arech kakojo e kuch'uqu ri uk'ixb'al ri ach'analik; chaloq'o' jun utzalaj kunab'al rech woq'och, kakoj pa ri awoq'och e xa jeri' katka'y ruk' k'ak' taq awoq'och chik. ¹⁹Ri in, ri ke'inloq'oq'ej, ke'inyajo e kink'ajisaj kiwach. ¡Chak'utu' b'a' ri achoq'ab' e chak'exa' b'a' ri ak'aslema!

²⁰Je' nak'ut, ri in, in k'o uloq chuwach ri uchi'ja e kink'ork'ot ukoq; we k'o jun ktow ri nuch'ab'al e kujaq ri uchi'ja chnuwach, kinok ri' pa ri rachoch arech kinb'an ri wa'im rech xre'qal ruk', ri in kink'o'ji' ri' chunaqaj ri are' e ri are' kk'o'ji' ri' chunaqaj ri in. ²¹Chech ri ch'akanel kinya b'e ri' chech arech kat'uyi' wuk' ri in cho ri Nutem, jeri' in jacha in aretaq chi' xinch'akanik, xint'uyi' ruk' ri Nutat cho ri Utem. ²²Ri jun che k'o uxikin, chutatab'ej b'a' ri tzij che kub'ij ri Uxlab'xel chkech ri Ekomon Tyox».

Jun alaj chij

⁴¹K'atek'uri', ri in xinwil weri': Jaqal jun uchi'ja' pa ri kaj, e ri jun ch'ab'al che xinta nab'e, che je' uch'ab'al je' jas jun tum, xinuch'ab'ej e kub'ij chwech: Chatpaqal uloq waral, k'atek'uri' kink'ut na chawach ri jastaq che kpe na, che kk'ulmataj na. ²Chi chanim, ri in xinok pa ri wuxlab'al. Xinwilo k'o jun tem pa ri kaj e k'o jun t'uyul cho ri jun tem. ³Ri jun

che t'uyulik, ri kka'yik je' jas ri je'likalaj jaspya ab'aj e ri je'lik kornalina ab'aj; k'o jun raxkyaq'ab' usutim rij ri nimalaj tem, ri kka'yik je' jas ri je'likalaj ab'aj esmeralda.

⁴Xinwil juwinaq kijeb' tem chunaqaj ri nimalaj tem e chuwach taq ri tem ri' et'uyul juwinaq kijeb' enim taq winaq che kikojom saq taq atz'yaq e k'o ketakik retz'b'alil kijolom rech q'an pwaq. ⁵Tza ri nimalaj tem kel uloq sib'alaj kaypa' e jujun taq ch'ab'al e sib'alaj kaqulja; e chuwach ri Nim Tem k'o wuqub' chaj che kanikow che q'aq', weri' are ri wuqub' Ruxlab'al ri Dyos. ⁶Chuwach ri nimalaj tem ri kka'yik je' jas jun tzintzojlaj polow, je' jas ri kristal. Panik'aj e chunaqaj ri nimalaj tem, etak'al ekijeb' Ek'ask'oj che k'o k'i kiwoq'och chkiwach e chkij. ⁷Ri nab'e k'ask'oj jeri' je' jas jun koj, ri ukab' k'ask'oj jeri' jacha jun alaj ama' wakax; ri urox k'ask'oj jeri' je' jas uwach jun winaq, ri ukaj k'ask'oj jeri' jacha jun xik che krapapik. ⁸Ri ekijeb' ek'ask'oj, chikijujunal k'o waqib' kixik', k'o k'i kiwoq'och chkij e chkipam. K'atek'uri' man ketani' ta che ub'ixik chi paq'ij chi chaq'ab':

Tyoxlaj ri ub'antajik,
Tyoxlaj ri ub'antajik,
Tyoxlaj ri ub'antajik,
ri Ajawxel, Dyos,
ajawxel chkech Konojel,
are are' iwir, are are' kamik e are are' che kpe na ri'.

⁹K'atek'uri', aretaq chi' ri Ek'ask'oj kkiya ri ukowinmlaj uq'ij ri malyoxinik chech ri Are' ri t'uyul puwi' ri nimalaj tem, ri Are' che k'aslik chub'eq'ij chub'esaq, ¹⁰ri juwinaq kijeb' enima'q taq winaq, kexuki'k kkijub'a' kiwach chuwach ri Are' che t'uyul cho ri nimalaj tem e nim kkil wi kkiq'ijilaj ri Are' che k'aslik chub'eq'ij chub'esaq; kkiyak ri ketakik retz'ab'alil kijolom chuwach ri nimalaj tem e kkib'ij:

¹¹Utz, taqal chawech, Qajaw e Qadyos
che kya chawech ri kowinem,
ri q'ijil e ri chuq'ab',
rumal rech che at xatb'anowik,
xatk'iysan ri uwachulew.
Rumal ri urayib'al ri Ajawxel
ri man k'o taj
xb'antajik e xk'ojik.

⁵¹K'atek'uri' xinwil pa ri rikyaq'ab' ri jun che t'uyul cho ri nimalaj tem, jun wuj che b'otolik, tz'ib'atal chuwach e chrij, t'iqatalik ruk' wuqub' t'iqab'al. ²K'atek'uri' xinwil jun kowlaj anjel che kuraq uchi' ruk' jun nimalaj ch'ab'al: «Jachin jun che utz taqal chrij, arech kujaq ri wuj e kuwaq'ij ri taq t'iqab'al?». ³K'atek'uri', man k'o ta jun kkowinik pa ri kaj, cho ri uwachulew, chuxe' ri uwachulew, che kkowinik kujaqo e kusik'ij uwach ri jun wuj. ⁴E ri in, sib'alaj kinoq'ik rumal rech che man k'o ta jun utz taqal chrij kujaqo e kusik'ij ri jun wuj. ⁵Chi chanim jun chkech ri enimalaj taq winaq kub'ij chwech: «Matoq'ik. Je' nak'ut, xch'akan ri koj rech ri ujuq'at ri Juda, ri rija'l ri David; ri are' kujaq na ri' ri wuj e ri wuqub' t'iqab'al».

⁶K'atek'uri', ri in xinwilo, che tak'al pa unikyajal ri nimalaj tem e pa kinik'yajal ri ekijeb' ek'ask'oj e pa kinik'yajal ri enimalaj taq winaq, jun alaj chij che je' jas kaminaq; k'o wuqub' ruk'a' e wuqub' uwoq'och che e'are wa' ri ewuqub' Ruxlab'al ri Dyos che etaqom pa ronojel ri uwachulew. ⁷Kuk'ama' ri wuj pa ri rikyaq'ab' ri t'uyul cho ri nimalaj tem. ⁸Aretaq chi' k'o ri are' che uk'amik ri wuj, ri ekijeb' ek'ask'oj e ri ejuwinaq kijeb' enimalaj taq winaq kkimej kib' cho ri uwach ulew chuwach ri alaj chij, chkijujunal k'o jun q'ojom arpa

kuk' e jun q'analay pwaq pajb'al che nojinaq che k'ok'alaj kunab'al, che are wa' ri kich'awem ruk' ri Dyos ri etyoxlaj taq winaq; ⁹e kkib'ixoj jun k'ak'alaj b'ix:

Utz e taqal chawech
 che kak'am we jun wuj
 e che kajaq ri taq ut'iqab'al,
 rumal rech che xatkamisax ri at
 e xe'aloq ruk' ri akik'el
 sib'alaj e'uwinaq ri Dyos,
 winaq rech ronojel kib'antajik,
 ronojel ch'ab'al, ronojel siwantinimit,
 ronojel amaq' rech uwachulew;
¹⁰e ri at, xab'an chkech
 ri e'are' chuwach ri Qadyos
 jun Ajawib'al kech chuchqajawib'
 che ke'ajawinik puwi' ri uwachulew.

¹¹K'atek'uri', xinwilo e xinta ri kich'ab'al sib'alaj e'anjelib' pa jun nimalaj mulin ib' kisutim rij ri nimalaj tem, ri Ek'ask'oj e ri enimalaj taq winaq -jek'o k'i rech sib'alaj ek'i, ek'o miles rech miles!-, ¹²kkib'ij ruk' raqoj chi'aj:

Ri kaminaq alaj chij, utz taqal chrij
 che kuk'am ri chuq'ab'alil,
 ri q'inomal, ri no'jib'al,
 ri kowinem, ri utzalaj wachaj,
 ri q'ijil e ri tewchi'b'al.

¹³K'atek'uri', ronojel ri xb'antaj pa ri kaj pa ri uwachulew, chuxe' ri uwachulew e pa ri polow, e ronojel ri k'o pa ri uwachulew, xinto che ruk' riqoj chi'aj kkib'ij:

¡Chech ri Are' che t'uyul cho
 ri nimalaj tem,
 e chech ri Alaj chij,
 ri tewchi'b'al, ri utzalaj wachaj,
 ri q'ijil e ri choq'ab'
 chub'eq'ij chub'esaq!

¹⁴K'atek'uri', ri ekijeb' ek'ask'oj kkib'ij: Amen; e ri enimalaj taq winaq keqaj che mejlem che xukulem che q'ijilanik.

Ri alaj chij kupaxij ri wuqub' t'iqab'al

⁶K'atek'uri', xinwilo, aretaq chi' ri alaj chij xujaq ri nab'e chkech ri wuqub' t'iqab'al, xinta'o che ri nab'e chkech ri ekijeb' Ek'ask'oj che kuraq uchi' je' jas jun ujaninb'al ri kuypa': «¡Tasa'j uloq!». ²Xinka'yik e xinwilo che k'o jun saq kej; e ri jun che ukejb'em k'o jun uch'ab'; ruk'am jun ketakik retz'ab'alil ujolom e xelik ch'akanel e arech kutaqej chi na ri ch'akanik. ³Aretaq chi' xujaq ri ukab' t'iqab'al, xinta'o che ri ukab' K'ask'oj kuraq uchi': «¡Tasa'j uloq!». ⁴K'atek'uri', xpe chi jun kej che kyaq je' jas ri q'aq', ri jun che ukejb'em, ruk'am ri pixab' arech kresaj ub'ik ri ja'maril cho ri uwachulew, arech kkikamisaj kib' chkixo'l; kuk'am jun nimalaj ch'ich' rech ch'o'j.

⁵Aretaq chi' xujaq ri urox t'iqab'al, xinta'o che ri urox K'ask'oj che kuraq uchi': «¡Tasa'j uloq!». K'atek'uri' xinwil jun q'eq kej; ri jun che ukejb'em k'o jun pajb'al pa uq'ab', ⁶xinta'o

jeri' je' jas jun ch'ab'al xas pa kinik'yajil ri ekijeb' Ek'ask'oj che kub'ij: «¡Jun pajb'al triko kya chech jun denari'o, oxib' pajb'al salwa't kya chech jun denari'o! ¡K'atek'uri', mab'an itzel chech ri ole'o e chech ri vino!»

⁷Aretaq chi' xujaq ri ukaj t'iqab'al, xinta'o ri uch'ab'al ri ukaj K'ask'oj: «¡Tasa'j uloq!». ⁸K'atek'uri' xinwil jun raxroj kej; ri jun che ukejb'em, «Kamikal» ri ub'i; e ri are' terne'b'em rumal ri Ades.

K'atek'uri' xkik'am ri kowinem puwi' jun chkech ri kijeb' uch'aqapil ri uwachulew arech kekamisan ruk' ri ch'ich' rech ch'o'j, ruk' ri wi'jal, ruk' ri ch'a'k, kuk' ri chikop e k'o chuwach ri ulew.

⁹Aretaq chi' kujaq ri uro' t'iqab'al xinwil chuxe' ri tab'al ri kuxlab'al ri xekamisaxik rumal rech che kkik'ut ri Utzij ri Dyos e che xkiya ri kitzij chrij. ¹⁰Kkiraqaqej kichi' ruk' jun kowlaj ch'ab'al:

«At Tyoxlaj e At saqalajtzij Ajawxel, ¿Chi k'a jampa na che man kab'an ta q'atoj tzij pakiwi' ri e'uwinaq ri uwachulew e che man kak'ajisaj ta kiwach rumal ri qakik'el uj?». ¹¹K'atek'uri', chkijujunal kya chkech jun saq atz'yaq e kb'ix chkech che kkeye'j chi na jub'iq', chi k'a jampa na kkimulij na kib' konojel ri epatanijel je' jas ri e'are' e ri ekachalal che kekamisax na je' jas ri e'are'.

¹²E kintaqej na rilik aretaq chi' kujaq ri uwaq t'iqab'al; xpe jun nimalaj kab'raqan e ri q'ij xujal q'eq' jeri' je' jas jun atz'yaq rech uwi' kej e ri ik' ronojel xujalo jeri' jas ri kik'el, ¹³e ri ch'umil chikaj xetzaq uloq cho ri uwachulew, jeri' je' jas kub'an ri wikox che kutzaq uloq ri rax taq uwach rumal jun nimalaj kyaqiq'; ¹⁴k'atek'uri' xsach ub'i ri kaj jeri' jas ub'otik jun wuj. E ronojel taq ri juyub' e ri ch'aqap taq ulew che ek'o pa ri polow xesilob'isaxik xas pa ri kik'olb'al. ¹⁵Ri e'ajawib' chuwachulew, ri enimalaj taq winaq, ri ekinimal nimalaj taq winaq, ri eq'inomab', ri ekowinel taq winaq, konojel chi winaq, chi emokom xkik'u' kib' pa taq ri pek cho taq ab'aj, e pa taq ri ab'aj k'o cho taq ri juyub', ¹⁶k'atek'uri' kkib'ij chech taq ri juyub' e chech taq ri ab'aj: «Chixtzaq uloq paqawi' e naj wi chujik'u' chuwach ri Jun che t'uyl puwi' ri nimalaj tem e chuwach ri nimalaj royowal ri alaj chij». ¹⁷Rumal rech xopan ri Nimalaj Uq'ij ri royowal e ¿jachin kkowin ri' che kkanaj kanoq chuwach?

Ri e'upataninel ri Dyos keto'taj kanoq

⁷K'atek'uri', xe'inwil ri ekijeb' anjelib' etak'alik pa ri uk'olb'al ri kijeb' uxkut uwachulew, kichapom ri kijeb' nimalaj taq kyaqiq', arech man kxut'un ta ri kyaqiq' cho ri uwachulew, cho ri polow, e man puwi' ta jun che'. ²K'atek'uri' xinwil ri jun anjel che paqalinaq chi pa ri relb'al q'ij uloq, ruk'am ri ut'iqab'al ri k'ask'ojlaj Dyos; ruk' kowlaj ch'ab'al kuraq uchi' chkech ri ekijeb' anjelib' che kik'amom ri kowinem arech kkib'an k'ax chech ri uwachulew e chech ri polow: ³«Chiweye'j na ri ub'anik k'ax chech ri uwachulew, chech ri polow e chech taq ri che' jampa na che xtz'ib'ataj qumal uj ri jun k'utb'al pa kikursal kupalaj ri e'upatanijelab' ri Qadyos». ⁴K'atek'uri', chi chanim weta'm chi ri kejalab'alil ri et'iqitalik: wuqk'al kijeb' mil, ekech konojel ri kijuq'at ri e'uwinaq ri Isra'el.

⁵Ekab'lajuj mil rech ri ujuq'at ri Juda ri k'o ri t'iqab'al chkech, ekab'lajuj mil rech ri ujuq'at ri Rub'en ri k'o ri t'iqab'al chkech, ekab'lajuj mil rech ri ujuq'at ri Gad k'o ri kit'iqob'al, ⁶ekab'lajuj mil rech ri ujuq'at ri Aser, ekab'lajuj mil rech ri ujuq'at ri Neftali, ekab'lajuj mil rech ri ujuq'at ri Manases, ⁷ekab'lajuj mil rech ri ujuq'at ri Sime'on, ekab'lajuj mil rech ri ujuq'at ri Levi, ekab'lajuj mil rech ri ujuq'at ri Isakar, ⁸ekab'lajuj mil rech ri ujuq'at ri Sab'ulon, ekab'lajuj mil rech ri ujuq'at ri Xep, ekab'lajuj mil rech ri ujuq'at ri B'enjamin che et'iqatalik.

Sib'alaj ek'i winaq

⁹K'atek'uri', xinwil chik, xe'el uloq sib'alaj ek'i winaq, che man k'o ta jun kkwini chkejalaxik, erech ronojel taq siwantinimit, ronojel amaq', konojel kib'antajik winaq, ronojel juq'at winaq, ronojel ch'ab'al; etak'al chuwach ri nimalaj tem e chuwach ri alaj chij, kikojom saqalaj taq atz'yaq, e k'o xaqchaj pa kiq'ab', ¹⁰ruk' kowlaj kich'ab'al kkiraqej kichi': «;Ri Kolotajem rech ri Qadyos che t'uyul cho ri nimalaj tem, xoquje' rech ri alaj chij!». ¹¹K'atek'uri' konojel ri e'anjelib' che kisutim rij ri nimalaj tem, ri Enimalaj taq Winaq e ri ekijeb' Ek'ask'oj, xeqaj che mejlem xuklem chuwach ri nimalaj tem e kkiq'ijilaj ri Dyos; ¹²kkib'ij:

;Amen! Tewchi'b'al, qijlanem, no'jib'al,
matyoxb'al, utzalaj wachb'al,
kowinem e chuq'ab'alil
chech ri Qadyos,
chub'eq'ij chub'esaq! ;Amen!

¹³Jun chkech ri Enimalaj taq Winaq, kub'ij chwech: «Le winaq le' che kikojom saqalaj taq atz'yaq, ;E jachin taq k'u la' le e'are' e jawije' xepe wi uloq?». ¹⁴Ri in kinb'ij chech: «Wajaw, at la' aweta'm». Kub'ij chi jumul chwech: «E'are la' ri e'are' ri epetinaq uloq chi pa ri nimalaj k'ax uloq; xkich'aj uloq ri katz'yaq e xkisaqarisaj uloq pa ri ukik'el ri alaj chij. ¹⁵Rumal k'u wa' weri', ri e'are' etak'al chuwach ri nimalaj Utem ri Dyos e kkipatanij ri are' chipaq'ij chichaq'ab' pa ri Nimalaj Rachoch; e ri t'uyul cho ri nimalaj tem kjeqi' na ri' kuk'. ¹⁶Man k'o ta chi jun ri' kyawajik rumal ri wi'jal e man kchaqij ta chi kichi' ri'; man kq'aq'an ta chi ri' ri q'ij pakiwi'; on jun q'aq'alaj kyaqiq' pakiwi'. ¹⁷Rumal rech, che ri alaj chij che tak'al pa unik'yajal ri nimalaj tem, are ajuyuq' ri' chkech ri e'are' e kuk'am b'i kib'e ri' pa ri uk'iyb'al ri ja' rech ri k'aslema. E ri Dyos kusu' na ri' ronojel uwa'l kiwach».

Ri uwuq t'iqab'al

⁸Aretaq chi', ri alaj chij kujaq ri uwuq t'iqab'al pa ri nik'yaj kajb'al, xk'oji' jun tz'inalik pa ri kaj, naj jub'iq' xuq'io.

Ri kich'awem ri etyoxlaj taq winaq

²K'atek'uri', xe'inwil wuqub' anjelib' che etak'al chuwach ri Dyos e xya'taj chkech, xkik'am wuqub' tum. ³Xpe chi jun anjel e xkanaj chunaqaj ri tab'al toq'ob', ruk'am jun q'analaj pwaq jopib'al. Xya'taj chech xuk'am k'ok'alaj taq kunab'al, arech ruk' ri kich'awem ruk' ri Dyos kech konojel ri etyoxlaj taq winaq kuchi'j cho ri q'analaj pwaq tab'al che k'o chunaqaj ri nimalaj tem. ⁴K'atek'uri', chi pa ri uq'ab' ri Anjel xaq'an ri usib'al ri k'ok'alaj taq kunab'al chuwach ri Dyos, rachi'l taq ri kich'awem ruk' Dyos ri etyoxlaj taq winaq. ⁵K'atek'uri' ri Anjel kuchap ukoq ri jopib'al e kunojisaj che ri q'aq' che rech ri tab'al e kuk'yaq cho ri uwachulew. K'atek'uri' kruq'panik ri taq kaqulja', k'o taq ch'ab'al, k'o taq kuypa' e k'o kab'raqan.

Ri wuqub' tum

⁶Ri ewuqub' anjelib' che kkik'am ri wu-qub' tum, kkisuk'umaj kib' che uroq'isaxik.

⁷Kroq'esaj ri nab'e e chi chanim kk'oji' saqb'ach e q'aq' ruk' kyaqlaj kik'el che kk'yaq puwi' ri uwachulew: e oxib' uch'aqapil ri uwachulew kportajik, e oxib' uch'aqapil ri taq che' kportajik, xoquje' ri raxlaj q'ayes kportajik.

⁸Ri ukab' anjel kroq'isaj chi ri tum, e ksetex pa ri polow jun jas uwach che jeri' je' jas jun juyub' rech q'aq', e oxib' uch'aqapil ri polow kujal kik'el. ⁹Kekam oxib' uch'aqapil ri e'awaj che ek'ask'oj pa ri polow e oxib' uch'aqapil taq ri kukub' ksachitaj uwach pa ri polow.

¹⁰Kroq'isaj chi ri tum ri urox anjel e ktzaqik chi cho ri kaj uloq jun nimalaj ch'imil che kk'atik je' jas jun ya'b'al q'aq', ktzaq puwi' ri oxib' uch'aqapil taq ri nima' e puwi' ri oxib' uch'aqapil ri uk'iyb'al taq ja'; ¹¹ri ch'umil ub'i' «Ajenjo»: ri oxib' uch'aqapil ri ja' chuwachulew kujal ajenjo, k'atek'uri' sib'alaj winaq kekam rumal we k'alaj ja' ri'.

¹²Kroq'isaj chi ri ukaj anjel, k'atek'uri' kch'aytaj ri oxib' uch'aqapil ri uwach ri q'ij, ri oxib' uch'aqapil uwach ri ik' e ri oxib' uch'aqapil taq ri ch'imil; jun che ri oxib' kich'aqapil q'equ'm kkanajik, ri paq'ij ksach uwach ri oxib' uch'aqapil usaqil e xoquje' ri chaq'ab'.

¹³K'atek'uri', kinwilo e kinto jun xik che krapapik cho ri nimalaj kaj e kuraq uchi' ruk' kowlaj uch'ab'al: «Itzel, itzel, itzel kech ri winaq rech ri uwachulew, aretaq chi' koq'esax na ri uch'ab'al ri k'isb'al taq tum kumal ri e'oxib' anjelib'».

Ri uro' anjel kroq'isaj ri tum

⁹¹K'atek'uri', ri uro' anjel kroq'esaj ri tum, e kinwil jun ch'imil che ktzaq uloq puwi' ri uwachulew. Kya'taj chech, kuk'am ri lawib'al che rech ri k'wa' rech ri nimalaj siwan. ²Kujaq ri k'wa' rech ri nimalaj siwan e kaq'an uloq jun sib' je' jas chi jun nimalaj q'aq' – kq'equ'mar uwach ri q'ij e ri kaj rumal weri' – ³k'atek'uri', chi pa we sib' ri', ke'el ub'i sak' puwi' ronojel ri uwachulew; kya'taj chkech kik'am jun kikowinem je' jas ri kech ri xkab' chuwachulew. ⁴Kb'ix chkech che kkito'o, kkikol kan ri q'ayes, ronojel rax e ronojel che' are xuwi kkik'ajisaj kiwach ri winaq che man k'o ta ut'iqab'al ri Dyos cho ri ukursal kupalaj. ⁵Man kya'taj ta chkech, man kkik'am ta ri kowinem che ke'kikamisaj ri e'are', xane xuwi kya'taj chkech arech job' ik' kkib'an k'ax chkech. Ri q'oxom kkiya'o je' jas ri uti'yo'b'al jun xkab'. ⁶Pa we taq q'ij ri', ri winaq kkitzujukuj ri' ri kamikal e man kkiriq ta ri', ;are kkaj ri' kekam e ri kamikal kanimaj ub'i ri' chkiwach ri e'are'!

⁷Ri esak' ri', jeri' keka'yik je' jas ri ekej che kesuk'umax che ub'anik ri ch'o'j; cho ri kijolom k'olik je' jas ketakik retz'ab'alil che q'anlaj pwaq kka'yik; ri kiwach kka'yik je' jas kiwach winaq; ⁸ri kiwi' je' jas ri kiwi' ri ixoqib' e ri kiware' je' jas ri kiware ri koj; ⁹ch'ich' ri uch'uqb'alil ri kib'aqil, ri ujabib'al kixik', je' jas ri utayik ch'ich' che jik'om kumal ek'i taq kej che kkitij b'enam pa ri ch'o'j. ¹⁰K'o kije' je' jas ri kije' ri xkab' che k'o kiti'yob'al; e pa ri kije' k'o ri kikowinem arech kkib'an k'ax job' ik' chkech ri winaq. ¹¹Ri kinimal je' jas jun ajaw, are ri Anjel rech ri nimalaj siwan; «Ab'addon» ri ub'i' pa heb're'o, «Apoli'on» pa gri'ego. ¹²Xpetajik ri nab'e k'ax, epetinaq chi na keb' k'ax.

Ri uwaq anjel

¹³Ri uwaq anjel xroq'esaj chi ri jun tum. K'atek'uri' xinta jun ch'ab'al che kel uloq pa ri kijeb' ruk'a' ri tab'al che q'analaj pwaq che k'o chuwach ri Dyos; ¹⁴kub'ij chech ri uwaq anjel che ruk'am ri tum: «Che'atzoqopij puwi' ri nim ja' e'ufrates ri ekijeb' anjelib' che eyutlik».

¹⁵K'atek'uri', ketzoqopisax ri ekijeb' anjelib' che keye'm ri kajb'al, ri q'ij, ri ik' e ri junab' arech kekikamisaj ri oxib' kich'aqapil ri winaq rech ri uwachulew. ¹⁶Ri e'uwinaq rech ch'o'j, ek'o lajuz k'al millones che kkikejb'ej kej: xinto, xb'ix chwech joropa' ri kajib'alil.

¹⁷Xe'inwil ri kej e ri winaq che ri kikejb'em, je' jas weri': ri winaq, q'aq' ri kich'uqb'al, rech jasinto e rech asufre; ri kijolom ri kej je' jas ri kijolom ri koj, e pa ri kichi' kkichub'aj q'aq', sib' e asufre. ¹⁸K'atek'uri', ri oxib' uch'aqapil ri winaq rech ri uwachulew xekam rumal we oxib' k'ax ri'; ri q'aq', ri sib' e ri asufre che kkichub'aj ri kej pa kichi'. ¹⁹Rumal rech che ri kikowinem ri kej k'o pa kichi' e pa ri kije'; rumal rech che ri kije' je' jas ri ekumatz, che k'o kijolom, e ruk' weri' kkib'an ri itzel.

²⁰K'atek'uri', ri winaq che man xekam ta pa taq we k'ax ri', man xkik'ex ta ri uchak ri kiq'ab': Man xetani' ta chech uq'ijilaxik ri jo's taq dyoses che eb'anom ruk' q'an pwaq, ruk' saq pwaq, ruk' saq ch'ich', ruk' ab'aj, e ruk' che'; che man kekowin taj keka'yik, ketanik, keb'inik. ²¹Man xetani' ta chech ri kamisanik, che ri itzb'al, che ri itzel k'aslemal e che ri elaq'.

Ri awatalik

¹⁰¹K'atek'uri', xinwil chi jun anjel che k'o uchoq'ab', kaqaj uloq chi chikaj uloq pa unik'yajal jun sutz', k'o jun raxkiyaq'ab' cho ri ujolom, ri uwachb'al kk'ayik je' jas ri q'ij e ri raqan je' jas q'aq' raqan taq ja. ²Pa uq'ab' k'o jun alaj wuj che jaqalik. Xuya ri rikyaq'ab' raqan puwi' ri polow e ri umox raqan puwi' ri uwachulew, ³k'atek'uri' xuraq uchi' ruk' kowlaj uch'ab'al je' jas kuraqaqej uchi' jun koj; e xtatajik che xech'aw wuqub' kaqulja. ⁴Aretaq chi' xech'awtajik ri wuqub' kaqulja, kwaj kintz'ib'anik, k'atek'uri' xinta jun ch'ab'al chi pa ri kaj uloq che kub'ij chwech: «Chak'u'u' ri tzij xkib'ij ri wuqub' kaqulja e matz'ib'aj wa'».

⁵K'atek'uri', ri jun anjel che xinwilo tak'al puwi' ri polow e puwi' ri uwachulew, xuyak ri rikyaq'ab' uq'ab' chikaj ⁶e xuya utzij puwi' ri Are' ri k'aslik chub'eq'ij chub'esaq, ri Are' che xb'anow ri kaj e ronojel ri k'o cho ri kaj, ri xb'anow ri uwachulew e ronojel ri k'o chuwach, ri xb'anow ri polow e ronojel ri k'o pa ri are': «Kamik ri' man kujb'iyitaj ta chik!». ⁷Xane' pa taq ri uq'ij ri uch'ab'al ri uwuq anjel, aretaq chi' kroq'esaj na ri tum, pa uchanim ri' kk'is uwach ri jastaq uwach awatalik che rech ri Dyos, ri utzalaj tzij che uya'om ub'ixik chkech ri e'upatanijel ri eq'axal utzij.

Ri alaj wuj kub'iq' ub'ik

⁸K'atek'uri', ri jun ch'ab'al che xinto xch'aw pa ri kaj, xinuch'ab'ej chi jumul e xub'ij chwech: «Jat, jak'ama' ri alaj wuj ri k'o pa ri uq'ab' ri anjel che tak'al puwi' ri polow e puwi' ri uwachulew». ⁹Xinb'ek, e xinta che ri jun anjel arech kuya ri alaj wuj chwech; k'atek'uri', ri are' kub'ij chwech: «Ch'ak'ama' ub'ik, chatija' b'a'; sib'alaj kuk'ak'arisaj na wa' ri awixko'l, k'atek'ut, pa ri achi' sib'alaj k'o uki'il wa' je' jas ri uwa'lche'». ¹⁰Xink'am ukoq ri alaj wuj pa ri uq'ab' ri Anjel e xintij ub'ik; pa ri nuchi' sib'alaj uki'il je' jas ri uwa'lche'; k'atek'ut aretaq chi xinb'iq' ub'ik, xunojisaj ri wixko'l che ri uk'ayil. ¹¹K'atek'uri', xb'ix chwech: «Rajawaxik che ri at kaq'axej ri utzij ri Dyos chkech sib'alaj esiwantinimit, chkech sib'alaj jetaq amaq', chkech sib'alaj taq ch'awib'al e chkech e'ajawinel».

Ri ekeb' eq'ataltzij chwij kkiq'axej na ri nutzij

¹¹¹K'atek'uri', xya chi chwech jun aj je' jas jun xk'ab', ruk' we tzij ri': «Chatwa'lijoq, e chawetaj ri Nimalaj Rachoch ri Dyos, ri tab'al e ri ewinaq che keq'ijilan chupam; ²ri uwoja cho ri Nim Rachoch ri Dyos chaya'a' kanoq, mawetaj b'a', rumal rech che kaya'taj na

chkech ri man k'o ta ri qakojonik kuk' arech che kkitak'alej na ri' ri tyoxalaj tinimit pa kawinaq keb' ik'.

³K'atek'ut, kinb'an na ri' che ri ekeb' eq'ataltzij chwij kkiq'axej na ri nutzij pa 1.260 q'ij ruk' jun koxtar katz'yaq». ⁴Ri e'are' ri', e'are' ri keb' che' olivos e are ri keb' chajb'al che etak'al chuwach ri Ajaw rech ri uwachulew. ⁵We k'o jun winaq kub'an k'ax chkech, chi kel q'aq' ri' pa kichi' arech kkiporoy ub'ik ri kik'ulel; je' nak'ut, ri jun che kraj kub'an k'ax chkech, je' na k'uri' ri ukamikal kuriqo. ⁶Ri e'are' k'o kikowinem che utz'apixik ri kaj arech man kpe ta jab' pa taq ri q'ij aretaq chi' kkib'an ri kichak; xoquje' k'o kikowinem puwi' ri ja' arech kkijal pa kik', e ri kowinem arech kkichasaj ri uwachulew ruk' k'ilaj taq k'ax xaq joropa mul kkaj ri e'are'.

⁷K'atek'ut, aretaq chi' xk'istaj ri kichak ri e'are', ri jun Chikop che xel uloq chi pa ri nimalaj siwan, kpe na ri' che ub'anik ri ch'o'j kuk' e'are' arech ke'uch'ako e ke'ukamisaj. ⁸E ri kaminaq taq kib'aqil ri e'are', kcholexik ri' pa ri k'ayib'al rech ri Nim Tinamit, che xaq pa ub'ixkil ub'i' Sodoma on Egipto, jawi' xoquje' xripab'ax wi ri Ajawxel, ⁹ri kaminaq taq kib'aqil ri e'are', kekanaj kan ri' chkiwach ri siwan taq tinimit, chkiwach taq ri juq'at winaq, chkiwach ri jetaq k'i ch'awib'al, chkiwach jetaq amaq', e kekik'a'yej ri' oxib' q'ij ruk' panik'aj q'ij; k'atek'uri' man ya'tal ta ri' arech kemuqik. ¹⁰Ri winaq rech ri uwachulew keki'kotik e kkinimaq'ijarisaj wa' weri'; e kkiya' sipanik chb'il taq kib', rumal rech, che we keb' eq'axal utzij ri Dyos ri', xkib'an sib'alaj k'ax chkech.

¹¹K'atek'ut, aretaq xok'ow ri oxib' q'ij ruk' ri panik'aj q'ij, ri Dyos kuya jun uxlab'al k'aslemal chkech ri e'are' pa ri kaqan, ketak'i'k, k'atek'uri' sib'alaj kkixej kib' ri ke'ilowik ri e'are'. ¹²Chi chanim xinta jun kowlaj ch'ab'al che kuraq uchi' chi chikaj wi: «Chixpaqal uloq waral!». Xepaqi' chikaj pa ri sutz' chkiwach ri kik'ulel. ¹³Pa we jun kajb'al ri' xpe jun nimalaj kab'raqan e xtzaq jun chech ri lajuj uch'aqapil ri tinimit, e xekam 7.000 winaq pa we k'ax ri'. Ri winaq che man xekam taj sib'alaj xkixej kib', e rumal k'u wa' nim xkil wi, xkiya uq'ijil ri Dyos k'o chikaj.

¹⁴Xok'owtajik ri ukab' k'ax, chi kamik ri' petinaq ri urox.

Ri uwuq anjel xroq'esaj ri tum

¹⁵Ri uwuq anjel, xroq'esaj ri tum. K'atek'uri' pa ri kaj xetataj nik'aj ch'ab'al che nim xe'il wi: «Xopan ri Rajawarem ri uwachulew che rech ri Qajaw e che rech ri Ukristo; e kajawinik chub'eq'ij chub'esaq».

¹⁶K'atek'uri', ri juwinaq kijeb' enimalaj taq winaq che et'uyul cho ri kitem chuwach ri Dyos, jupalik ktzaq kiwach che uq'ijilaxik ri Dyos; ¹⁷kkib'ij:

«Kqamalxyoxij chaweche, Qajawxel,
Dyos Ajawxel, ajchaq'e ronojel,
ri Are' che are kamik, ri Are' che are Iwir,
rumal rech che xakoj pa ri aq'ab'
ri nimalaj achuq'ab' arech
kajeqb'a' ri awajawib'al.

¹⁸Ri jetaq amaq' xas petinaq ri koyowal;
k'atek'ut, kamik ri' xopan ri awoyowal,
e kamik ri' rajawaxik che kb'antaj
q'atojtzij pakiwi' ri ekaminaqib';
kamik ri' rajawaxik che ri e'apataniyelab'
ri eq'axal taq atzij,
kya'taj chkech kkik'am ri tojb'al kech,

xoquje' ri etyoxlaj taq winaq,
 ri e'are' che kkixe'j kib' chuwach ri ab'i',
 chi ech'uti'n chi enima'q,
 e che kchasax kiwach ri e'are'
 ri kchasaj uwach ri uwachulew».

¹⁹K'atek'uri', xjaqataj ri Nim Rachoch ri Dyos pa ri kaj, e xq'alajinik ri arka uk'olb'al ri chapb'al uq'ab' ri Dyos pa ri Nim Rachoch ri Dyos; k'atek'uri' xruq'apanik taq kuypa', xjinin taq ch'ab'al e taq kaqulja, xpe nimalaj kab'raqan e nimalaj saqb'ach.

Ri Ixoq

12¹K'atek'uri', jun nimalaj k'utb'al xq'alajin pa ri kaj: Jun Ixoq satalik rij rumal ri q'ij, k'o ri ik' chuxe' ri raqan e kab'lajuj ch'imil ub'anom jun ketakik retz'ab'alil puwi' ri ujolom. ²Ri are' yawab' ixoq chik e kuraqagej uchi' rumal ri k'ax kuriqo aretaq chi' ku'tzir ruk' ri ak'al.

³Jun ukab' k'utb'al chik xq'alajin pa ri kaj: jun nimalaj chikop che q'aq' ri are', k'o wuqub' ujolom e lajuj ruk'a', puwi' taq ri ujolom k'o jun ketakik chapb'al uwi'. ⁴Ri uje' kujokej jun chkech ri oxib' uch'aqapil taq ri ch'imil k'o cho ri kaj e kuk'yaq uloq chuwach ri ulew. Ri jun chikop ri' xtak'i' chuwach ri ixoq che ku'tzir ruk' ri ak'al arech kutij ub'i ri alaj ak'al aretaq chi' ka'laxik. ⁵Ri ixoq kril uwach jun alaj ala, ri Are' che ke'uyuy'uj na ri' konojel ri winaq ruk' jun ch'ich' ch'imi'y; k'atek'uri' ri ral xk'am ub'ik chi k'a chuwach ri Dyos e chi k'a ri nim utem, ⁶ri ixoq xanimaj ub'ik pa ri tz'inalikalaj ulew, jawi' xusuk'umaj ri Dyos chech jun uk'olib'al, arech ri are' kk'o'ji' chila' e k'o uwa pa 1.260 q'ij.

⁷K'atek'uri', xmajtaj jun ch'o'j pa ri kaj: ri Migue'l e ri anjel erachb'il are' kech'o'jin ruk' ri jun chikop. Xoquje' ri jun chikop e ri e'anjel erachb'il kech'o'jinik, ⁸k'atek'ut, we e'are ri' man k'o ta chi kichuq'ab' e man xk'o'ji' ta chi kik'olb'al pa ri kaj. ⁹Xk'yaq uloq ri Nimalaj Chikop, che ri ojer kumatz, ri k'axtok' on ri Satanas ub'i', ri taqchi'nel chech ronojel ri uwachulew; xk'yaq uloq puwi' ri uwachulew, ri e'anjel erachi'l are' xek'yaq uloq ruk' ri are'. ¹⁰K'atek'uri' xinta jun kowlaj ch'ab'al pa ri kaj:

«Kamik ri' xopan ri ch'akanik, ri chuq'ab' e ri ajawib'al chech ri Qadyos e ri kowinem chech ri Ukristo, rumal rech che xpolex ub'ik ri kub'ij ri itzel pakiwi' ri eqachalal, ri are' che kub'ij ri itzel pakiwi' chi paq'ij ri chich'aq'ab' chuwach ri Qadyos.

¹¹K'atek'ut, ri e'are', xkich'ako rumal ri ukik'el ri alaj chij e rumal ri kitzij xkiya ub'ixik, rumal rech che man xkiya ta nim uq'ij ri kik'aslemal chi k'ate' kekamik.

¹²Chixki'kotoq ri ix, ri kaj e ri siwantinimit rech ri kaj, ¡Itzel chiwech ri ix!, ri uwachulew e ri polow, rumal rech che ri k'axtok' xqaj uloq pa ri ik'olb'al ruk' nimalaj royowal e reta'm che xa ejalam chik ri jetaq uq'ij».

¹³Aretaq chi' ri jun chikop xrilo che xpolex uloq puwi' ri uwachulew, xroqataj ri jun Ixoq, ri Nan e ri ala ral. ¹⁴K'atek'ut, xya'taj chech kuk'am ub'ik ri keb' uxik' ri jun nim xik arech krapap ub'i pa ri tz'inalikalaj ulew, chi k'a pa ri uk'olb'al, che naj chech ri kumatz, jawije' chi k'o wi ri uwa pa jun junab', pa keb' junab' e xa panik'yaj junab'. ¹⁵K'atek'ut, ri jun kumatz xuxab'ej uloq puchi' je' jas jun nima' chrij ri Ixoq, arech kujurej uloq ri Ixoq. ¹⁶K'atek'ut, ri uwachulew xpe che uto'ik ri Ixoq, ri uwachulew kuk'ab'a' ri uchi' e kutij ub'i ri jun nima' che xuxab'ej ri jun kumatz.

¹⁷Xas chanim xpe royowal ri jun kumatz chech ri Ixoq, k'atek'uri' kb'e che ub'anik ch'o'j k'uk' ri eralk'uwa'l chik, ri kkik'ol ri Upixab' ri Dyos e ri k'o ri Utzij ri Jesus kuk'.

Ri jun Chikop

¹⁸Ri in, intak'al puwi' ri sanyib' rech ri polow.

¹³K'atek'uri', xinwilo che kel uloq pa ri polow, jun chikop che k'o wuqub' ujolom e lajuj ruk'a'; puwi' ri taq ri ruk'a' k'o lajuj ketakik chapb'al wi'aj, e puwi' taq ri ujolom tz'ib'atalik itzel taq tzij chech ri Dyos. ²Ri jun chikop che xinwilo chujala ub'i jun b'alam, ri raqan chujala ub'i raqan oso e ri uchi' je' jas uchi' koj; k'atek'uri' ri jun nimalaj chikop kuq'axej ri uchuq'ab' chech, ri nimalaj utem e kuya jun nimalaj ukowinem. ³Jun chech taq ri ujolom je' jas uriqom kamikal, k'atek'ut ri nimalaj soktajinaq wi che kamikal, xkunatajik; k'atek'uri', konojel ri winaq chuwachulew, sib'alaj utz xkil weri' e xkiterneb'ej ri jun chikop. ⁴Jupalik xtzaq kiwach chuwach ri Nim Chikop, rumal rech che xuya ri kowinem chech ri jun chik chikop; k'atek'uri' jupalik xtzaq chi kiwach chuwach ri jun chik chikop e xkib'ij: «¿Jachin jewa' je' jas we jun chikop ri', e jachin kkowinik kch'o'jin ruk' ri are'?» ⁵Xya'taj chech are' e xuk'am ri kowinem arech kub'ij ri tzij rech taq ri nimal e ri itzel taq tzij chech ri Dyos; xuk'am we kowinem ri' arech kub'an weri' pa kawinaq keb' ik'; ⁶k'atek'uri', xub'ij ri itzel taq tzij chech ri Dyos, xub'ij itzel taq tzij chech ri ub'i' e chech ri Rachoch, e chkech ri ek'o pa ri kaj.

⁷Xya'taj ri kowinem chech arech kub'an ri ch'o'j chkech ri etyoxlaj taq winaq e arech ke'uch'ako. Xya'taj ri kowinem chech puwi' konojel kib'antajik ri winaq, pakiwi' konojel siwantinimit, puwi' ronojel ch'awib'al on puwi' ronojel amaq'. ⁸E konojel winaq chuwachulew che ri man tz'ib'atal ta ri kib'i' pa ri wuj rech ri uk'aslemal ri kaminaq alaj chij chi pa ri umajib'al uloq ri uwachulew, ke'ok che uq'ijilaxik ri jun chikop. ⁹Ri jun che k'o uxikin, chutatab'ej b'a weri'! ¹⁰Ri jun che kyut che ch'ich' chi kyut wi; ri jun che kkam rumal ch'ich' chi ruk' ch'ich' ri' kkam na ri': Pa weri', chi rajawaxik wi ri kikoch'onik e ri kikojonik ri etyoxlaj taq winaq.

Ri jun chik Chikop

¹¹K'atek'uri', xinwil chi jun chikop che xel ub'i pa ri uwachulew; k'o keb' ruk'a' je' jas ruk'a' jun chij, kch'awik je' jas jun Nim Chikop. ¹²Kchakunik patanijel rech ri jun nab'e chikop, kukoj ri ukowinem pa ronojel k'olb'al e kub'ano che ronojel ri uwachulew e konojel ri siwantinimit kkiq'ijilaj ri jun nab'e chikop che soktajinaq che kamikal k'atek'uri' xkunatajik. ¹³Xub'an nimalaj taq k'utb'al: Chi kub'ano che ktzaq uloq q'aq' chikaj puwi' ri uwachulew chkiwach konojel winaq; ¹⁴k'atek'uri', rumal ri nimalaj taq k'utb'al kkowinik kub'ano rumal rech upatanijel ri jun nab'e chikop kub'ano jo's chkech ri winaq rech ri uwachulew, kub'ij chkech che kkiyak jun uwachb'al ri jun nab'e chikop che xjich'taj rumal ri ch'ich', k'atek'uri', xk'o'ji' chi na jumul uk'aslemal.

¹⁵K'atek'uri', k'o ri ukowinem arech kkowinik kuya jun uxlab'nik chech ri jun uwachb'al ri jun chikop arech kch'awik, e arech che kekamisaxik konojel ri winaq ri man kkiq'ijilaj ta ri uwachb'al ri jun chikop. ¹⁶Rumal ri uchak, konojel winaq, chi ch'uti'n, chi nim, chi q'inom, chi meb'a', chi ajaw, chi patanijel k'o jun k'utb'al che ri kikyaaq'ab' kiq'ab' on cho ri ukursal kupalaj, ¹⁷k'atek'uri', man k'o ta jun winaq kkowinik kuloq' na jun jas uwach on kuk'ayij jun jas uwach we man k'o ri k'utb'al rech ri ub'i' ri chikop ruk' on we man k'o ta ri rajalab'alil ri ub'i' ruk'.

¹⁸Waral ri', rajawaxik ri no'jib'al: Ri winaq che kkowinik chrejajalaj b'a ri rejalb'alil ri jun chikop, weri', xane' jun rejalab'alil jun winaq: ri rejalab'alil are ri 666.

Ri Alaj Chij puwi' ri juyub' Si'on

¹⁴K'atek'uri', ri Alaj Chij xuk'ut rib' chuwach taq ri nuwoq'och; ri are' tak'al puwi' ri juyub' Si'on, ruk' 144.000 winaq che k'o ri ub'i' ri Are' e ri ub'i' ri Utat cho ri ukursal kupalaj.

²K'atek'uri' xinta'o che k'o kchojojik pa ri kaj, je' jas ri uchojob'al ri nimalaj taq ja' on ri uch'ab'al ri kaqulja, on ujaninb'al jun nimalaj kyaqiq', e we xinto ri' je' jas ewinaq che kkiq'ojomaj ri arpa; ³kkib'ixoj jun k'ak' b'ix chuwach ri nimalaj tem e chkiwach ri ekejeb' ek'ask'oj e chkiwach ri Enima'q taq Winaq. E man k'o ta jun xkowin chi reta'maxik ri b'ix, xuwi ri 144.000. ri eloq'om xas pa ri uwachulew. ⁴E'are ri e'are' ri man xkib'an ta ri itzel kuk' ri ixoqib', ek'ojolab' ri e'are'; ri e'are' che kkiteremb'ej ri alaj chij pa ronojel k'olb'al jawi' keb'e wi; ri e'are' eloq'om chi chkixo'l ri winaq je' jas e nab'e taq toq'ob' chuwach ri Dyos e chuwach ri Alaj Chij. ⁵Mawi ri kichi' xuch'ob' ri jo's taq tzij; ri e'are' e ch'ajch'oj taq winaq.

Jun junalik utzalaj tzij

⁶K'atek'uri', xinwil chi jun anjel che krapap pa ri nimalaj kaj, k'o jun junalik utzalaj tzij ruk' che kuya na ub'ixik chkech ri kekanaj kan chuwach ri uwachulew, chkech konojel amaq', chkech konojel kib'antajik juq'at winaq, chkech konojel ch'awib'al e chkech konojel siwantinimit.

⁷Kuraq uchi' ruk' jun kowlaj ch'ab'al: «Chixe'j iwib' chuwach ri Dyos e nim chiwila' wi, rumal rech che xopan ri kajb'al rech ri q'atb'al utzij; nim chiwila' wi ri Are' che xb'anow ri kaj e ri uwachulew, ri polow e taq ri uk'iyb'al ja'».

⁸E jun ukab' anjel chik xuterne'b'ej ri are' kuraq uchi': «Xchachi', xchachi', ri Nimalaj B'ab'iloni'a, ri xyo'w ri amaja' rech royowal ri itzel k'aslemal chkech konojel tinimit, arech kkitijo».

⁹Jun urox anjel chik, ke'uterne'b'ej ri e'are', kuraq uchi' ruk' jun kowlaj ch'ab'al: «Ri jun che nim kril wi ri chikop e nim kril wi ri uwachb'al, e k'o ri uk'utb'al cho ri ukursal upalaj on cho ri uq'ab', ¹⁰ri are', xoquje' kutij na ri' ri amaja' rech ri royowal ri Dyos, che suk'umatajinaq chik, xas utz, pa ri pajb'al amaja' rech ri royowal. Ri are' kuna na ri k'ax rumal ri q'aq' e rumal ri asufre, chkiwach ri etyoxlaj taq anjelib' e chuwach ri Alaj Chij. ¹¹K'atek'uri', ri usib'al ri kik'axk'ol, kwa'lij chub'eq'ij chub'esaq; man kk'o'ji' ta ja'maril, chi paq'ij chi chaq'ab' chkech ri nim kkil wi ri jun chikop e ri jun uwachb'al, xoquje' ri kek'amow ri uk'utb'al ub'i'». ¹²Pa weri' rajawaxik ri kichuq'ab' ri etyoxlaj taq winaq, ri kkik'ol ri upixab' ri Dyos e ri kkik'ol ri kojoni'k chrij ri Jesus.

¹³K'atek'uri' xinta jun ch'ab'al pa ri kaj che xub'ij chwech: «Chatz'ib'aj: Utz kech ri kaminaqib' che kekam ruk' ri Ajawxel; chi ukamik ub'ik ri' -je' nak'ut, kcha ri Uxlab'xel-kk'o'ji' ri ja'maril chech ri kikosib'al, rumal rech che xas b'enaq ri kichak kuk'».

Chanima' ub'i le ach'ich' pa le triko e chatq'atanoq

¹⁴K'atek'uri', xq'alajin chuwach taq ri nuwoq'och jun saqalaj sutz', e puwi' ri sutz' tuyul jun che je' jas ralk'uwa'l winaq, k'o puwi' ri ujolom jun q'analaj pwaq ketakik retz'ab'alil ujolom e pa ri uq'ab' jun utzalaj ch'ich'. ¹⁵K'atek'uri', jun anjel chik, xel uloq pa ri Nimalaj Rachoch ri Dyos e kuraq uchi' ruk' jun kowlaj ch'ab'al chech ri jun che t'uyul puwi' ri sutz': «Chak'yaqa' ub'i le ach'ich' e chatq'atanoq, rumal rech che we kamik ri' rajawaxik kb'an ri

q'atoj; ri triko rech ri uwachulew q'an chik». ¹⁶E ri jun che t'uyul puwi' ri sutz' xuk'yaq ri ch'ich' puwi' ri uwachulew e xb'antaj ri q'atoj, xb'antaj ri chak chuwach ri uwachulew.

¹⁷K'atek'uri' jun anjel chik, xel uloq pa ri Nim Rachoch ri Dyos chikaj, xoquje' ruk'am jun utzalaj ch'ich'. ¹⁸E xel chi uloq jun anjel pa ri tab'al -ri anjel che kuk'ol ri q'aq' - kuraq uchi' ruk' jun kowlaj uch'ab'al chech ri jun che k'o ri utzalaj ch'ich' ruk': «Chak'yaqa' ub'i ri utzalaj ach'ich', chaq'ata' ri uwach ri tikb'al uva rech ri uwachulew, rumal rech che chaq' chik ri uwach». ¹⁹Ri jun anjel ri', kuk'yaq ri jun uch'ich' puwi' ri uwachulew, xuch'up uwach ri tikb'al uva e xujokej ub'ik ronojel pa ri yitz'b'al rech royowal ri Dyos; nimalaj ri yitz'b'al! ²⁰K'atek'uri' ri yitz'b'al xtak'ale'x uwi' tza'n taq ja chech ri tinimit, e xb'ulb'utik uloq kik'el che xopan k'a pa ri ch'ich' che k'o pakichi' ri kej, xchemchatik puwi' 1.600 estadi'os.

Ri ub'ix ri Mo'ises

15¹K'atek'uri', xinwil chi jun nimalaj e utzalaj k'utb'al pa ri kaj: wuqub' anjel che kuk'am wuqub' k'axk'olil, ri kisb'al taq k'axk'olil, rumal che ruk' weri' kk'is ri royowal ri Dyos. ²Xinwil chik, je' chujala' ub'ik jun polow rech ktzintzatic kristal ruk' q'aq', e ri e'are' che xech'akan chuwach ri jun chikop e chuwach ri uwachb'al e chuwach ri rejalah'alil ri ub'i', etak'al chuwach we polow ri' che ktzintzatic kristal. Kkiq'ojomaj taq ri arpas rech ri Dyos, ³kkib'ixoj ri ub'ix ri Mo'ises, ri upatanijel ri Dyos e ri ub'ix ri Alaj Chij:

Nimalaj taq ub'antajik
e utzalaj taq ri achak,
Ajawxel, Dyos Ajaw chech ronojel;
suk'alaj ub'antajik e utzalaj taq ri ab'e,
Ajawinel chkech taq ri tinimit.
⁴Jachin man kuxib'ij ta rib'
chuwach ri ab'i', Ajawxel;
e jachin man nim ta kril wi ri ab'i'?
Rumal rech che xuwi ri at,
tyoxlaj ri ab'antajik;
e konojel ri' ri man junam ta qakojonik
kuk' kepe na ri' e mejlik xukulik
ri' ketzaq na chawach,
rumal rech che xaq'alajisaj
ri utojb'alil ri awoyowal.

Ri wuqub' anjelib'

che kuk'am ri wuqub' k'ax

⁵K'atek'uri', ri in, xinwilo che kjaqatajik ri Nim Rachoch ri Dyos pa ri kaj, e pa ri ukab'al ri Testimoni'o, ⁶xe'el uloq ri wuqub' anjelib' che kuk'am ri wuqub' k'ax, kikojom katz'yaq saqatuntuj taq lino, sib'alaj je'lik kchupchatik, ri ximb'al taq kipam q'anlaj pwaq.

⁷K'atek'uri', jun chkech ri ekijeb' che Ek'ask'oj, xuya chkech ri ewuqub' anjelib' wuqub' q'anlaj taq pwaq pajb'al amaja' nojinaq chech ri royowal ri Dyos, ri Are' che k'aslik chub'eq'ij chub'esaq. ⁸E ri Nim Rachoch ri Dyos xnojik chech ri usib'al ri Uq'ijil ri Dyos e chech ri uchuq'ab', e man k'o ta jun kkwonik kok ub'i chupam xas k'ate' na aretaq chi' kk'is ri wuqub' k'axk'olil kech ri ewuqub' anjelib'.

16¹K'atek'uri' xinta jun ch'ab'al che chi pa ri Nim Rachoch ri Dyos kuraq uloq uchi' chkech ri ewuqub' anjelib' e kub'ij chkech: «Jix, jitixa' puwi' ri uwachulew ri wuqub' pajb'al amaja' rech ri royowal ri Dyos».

²Xb'e ri nab'e e xutixej ri jun pajb'al rech royowal ri Dyos puwi' ri uwachulew; k'atek'uri', ri winaq che k'o ri uk'utb'al ri jun chikop kuk' e ri mejlem xukulem xeqaj chuwach ri jun uwachb'al, xpe jun itzel e k'axalaj yab'il xas chkipam.

³Ri ukab', xutixej ri jun pajb'al pa ri polow; e xujal kik' -je' jas ukik'el jun kaminaq- e ronojel k'ask'oj xkam pa ri polow.

⁴Ri urox xutixej ri jun pajb'al pa taq ri nima' e pa taq ri uk'iyb'al ja'; k'atek'uri' xujal kik'.

⁵K'atek'uri', xinto che ri anjel rech taq ri ja' kub'ij: «At suk'alaj ri At, ri Are' che are kamik, ri Are' che are iwir, ri Tyoxlaj, rumal rech che jewa' ri uk'ajisax wach kab'ano; ⁶ri e'are' xkiq'ejej ri kikik'el ri etyoxlaj taq winaq e ri kikik'el ri eq'axal utzij ri Dyos, e ri at, xab'ano arech nakut xkiquumuj ri kik'el, utz e taqal weri' chkech». ⁷K'atek'uri', xinto, che ri tab'al kub'ij: «Je', Ajawxel, Dyos Ajaw chech ronojel, saqalajtzij e suk'alaj taq ri k'ax kab'ano».

⁸Ri ukaj anjel xutixej ri upajb'al puwi' ri q'ij; e xya'taj chech xuk'am ri kowinem che ke'uporoy ri winaq ruk' ri q'aq', ⁹e ri winaq xeporox rumal jun nimalaj q'aq'. K'atek'ut, ruk' weri', man xkijal ta ri kik'aslemal, man nim taj xkil wi ri Dyos, xkib'ij itzel taq tzij puwi' ri ub'i' ri Dyos che k'o ri ukowinem puwi' taq we k'ax ri'.

¹⁰Ri uro', xutixej ri upajb'al puwi' ri nimalaj utem ri jun Chikop; e ri rajawib'al xq'equ'marik, k'atek'uri', ri winaq xkiti' ri kaq' rumal ri q'oxom. ¹¹E ri winaq man xkijal ta ri kichak, xkib'ij itzel taq tzij puwi' ri Dyos rajaw ri kaj, rumal ri uchuq'ab' ri q'oxom e rumal taq ri ch'a'k.

¹²Ri uwaq, xutixej ri upajb'al puwi' ri nimalaj nima' E'ufrates; xtzaj ri ujoron, e xk'oji' jun b'e kech ri E'ajawinel kepe pa ri relb'al q'ij. ¹³K'atek'uri', xinwilo, che chi pa ri uchi' ri Nimalaj Chikop, chi pa ri uchi' ri jun chik chikop, e chi pa ri uchi' ri jun itzel q'axal utzij ri Dyos, xe'el uloq oxib' itzel taq uxlab'al, je' jas taq ri ixtutz'. ¹⁴-Ri e'are', qastzij che e'itzel taq uxlab'al, kkib'an nimalaj taq jastaq, keb'e che kimulixik ri e'ajawinel rech ronojel ri uwachulew arech kech'o'jinik pa ri Nimalaj Uq'ij ri Dyos Ajawxel chech ronojel. ¹⁵Je' nak'ut, ri in kinpetik je' jas jun elaq'om: Utz rech ri winaq che kk'asi'k e che kuk'ol ri ratz'yaq arech man kch'anch'atik taj e man kilitaj ta ri jetaq uk'ixb'alil. ¹⁶Xkimulij kib' pa jun k'olb'al che ub'i' pa ri Heb're'o: Harmagedon.

¹⁷Ri uwuq, xutixej ri upajb'al pa ri kyaqiq': k'atek'uri', chi pa ri Nim Rachoch ri Dyos, kel uloq jun ch'ab'al che kub'ij: «Xk'isik ri ub'anik!».

¹⁸K'atek'uri', xub'an sib'alaj kaypa', sib'alaj kjaninik taq ch'ab'al e kruq'pan kaqulja e xpe jun nimalaj kab'raqan. jJayi', chi man ub'anom ta wi xas pa ri umajib'al uloq che ek'o winaq chuwach ri uwachulew, man ilitajinaq ta jun nim kab'raqan je' jas weri'! ¹⁹Ri Nimalaj Tinimit xjachataj pa oxib' utz'aqatil, k'atek'uri' ri tinimit kech taq ri amaq' xewilil ub'ik; e ri Nimalaj B'ab'iloni'a, kna'taj chech ri Dyos, arech kuya ri jun pajb'al chech jawi' kpoq'ow wi ri amaja' rech royowal. ²⁰K'atek'uri', ronojel taq ri ulew che k'o pa ri polow xe'animajik, ri jetaq juyub' xesachik. ²¹E jun nimalaj saqb'ach -je' jas jumuch' pajb'al ra'lal- xtzaq uloq chikaj pakiwi' ri winaq. K'atek'uri', ri winaq chi xkib'ij ri itzel taq tzij puwi' ri Dyos, rumal ri itzelalaj saqb'ach ri'; tzij nak'ut che we saqb'ach ri' xub'an nim itzelalaj k'ax.

Ri etamatal uwach ixoq kech nim ch'uti'n

17¹K'atek'uri', jun chkech ri ewuqub' anjelib' che kuk'am ri wuqub' pajb'al amaja', xpetik e xub'ij chwech: «Chasa'j uloq, ri in kink'ut na chawach ri q'atojtzij kab'antaj puwi' ri jun eta'matal uwach ixoq kech nim ch'uti'n, ri are' che t'uyul chuchi' ri nim taq ja', ²ruk' ri are' xemakunik xkib'an ri itzel ri e'ajawinel rech ri uwachulew, e ri winaq ek'o chuwachulew xeq'ab'ar rumal ri amaja' rech ri itzelalaj uk'aslemal».

³Xinuk'am ub'i pa ri tz'inalik ulew xaq pa ri wuxlab'al. K'atek'uri', xinwil jun ixoq, t'uyul chrij jun chikop kyaq kka'yik, nojinaq itzel taq tzij chrij, k'o wuqub' ujolom e lajuz ruk'a'. ⁴Ri jun ixoq ukojom kyaqtuntuj e eskarlata atz'yaq, kch'ub'lin che q'an pwaq, che je'likalaj taq ab'aj e che ktzintzatic taq ab'aj; ruk'am pa uq'ab' jun q'analaj pwaq pajb'al amaja' nojinaq che itzel taq jastaq, nojinaq che ri itzelalaj uk'aslemal, che ri umak kuk' enim ch'uti'n. ⁵Tz'ib'atalik cho ri ukursal upalaj jun b'i' -jun awatalik jas uwach-. «Ri nimalaj B'ab'iloni'a, ri kinan ri ixoqib' che ekech nim ch'uti'n e Nan che ri itzel taq jastaq chuwachulew». ⁶K'atek'uri', chi chuwach taq ri nuwoq'och, ri jun ixoq xq'ab'ar ruk' ri kikik'el ri etyoxlaj taq winaq e ruk' ri kikik'el ri xekam rumal ri kikojonik chrij ri Jesus. Aretaq chi' xinwil weri' sib'alaj xsach nuk'ux, ⁷k'atek'uri', ri Anjel kub'ij chwech: «Jasche ksach ak'u'x chech weri'? ri in kinya na ub'ixik chawech ri awatalik taq jastaq puwi' ri ixoq ri' e puwi' ri jun chikop che ruk'am are', ri jun chikop che k'o wuqub' ujolom e lajuz ruk'a'.

We ucholajik ri jun chikop e ri ixoq kech nim ch'uti'n

⁸«We jun chikop ri', ri are' che k'o iwir, k'atek'ut chi ukamik ri' kk'is uwach. Kamik ri', kel na uloq pa ri Nimalaj Siwan, e kuchap ub'e pa ri uk'isb'alil uwach. K'atek'uri', konojel ri winaq ek'o chuwachulew ri man tz'ib'atal ta ri kib'i' pa ri wuj rech k'aslemal chi aretaq chi' xb'antaj ri uwachulew, sib'alaj utz kkil na ri' ri uchak ri Chikop che ri are' k'o iwir e ukamik ri' xk'is uwach, k'atek'ut, chi k'ate' chi na ri' kuk'ut chi na rib'.

⁹Chi waral wi rajawaxik jun uxlab'al ruk' no'jib'al! Ri wuqub' jolomaj are ri wuqub' juyub' jawi' t'uyul wi ri jun ixoq.

«Xoquje', weri', ewuqub' ajawinel, ¹⁰ejob' xk'istaj kiwach, jun k'aslik na uwach, e jun chik maja' petinaq. Aretaq chi' kpetik rajawaxik che xa jub'iq' kuq'i'o. ¹¹K'atek'uri', ri jun chikop che ri are' are iwir e chi ukamik xk'is uwach, are are' ri uwajxaq, k'atek'ut are jun chkech ri ewuqub'; ri are' b'enaq che ri ukamikal.

¹²Ri lajuz ruk'a' e'are elajuz ajawinel che maja' kik'amon ri ukowinel kajawinem, ruk' ri jun chikop kkik'am na ri' ri jun kowinem ke'ajawinik xaq pa jun kajb'al. ¹³Konojel kkaj kkijach ri kichuq'ab' e ri kikowinem chech ri jun chikop. ¹⁴K'atek'uri', e'are wa' we e'are' ri' kech'o'jin na wa' ruk' ri Alaj Chij, e ri Alaj Chij xas ke'uch'ak na ri', rumal rech che ri are' are ajaw chkech ri e'ajawib', ajawinel chkech ri e'ajawinel, ke'uch'ak na kuk' ri e'uwinaq: ri xesik'ixik, ri echa'om, ri utz kitak'alem kib'anom pa ri kikojonik.

¹⁵«Xoquje' ri Anjel kub'ij chwech: Ri ja' jawi' t'uyul wi ri jun ixoq kech enim ch'uti'n, e'are wa' ri jetaq tinimit, ri siwan taq tinimit, ri ejuq'at taq winaq e ri jetaq ch'awib'al. ¹⁶K'atek'uri', we lajuz ruk'a' e ri jun chikop, sib'alaj itzel kkil na e kkina' chech ri jun ixoq che ekech enim ch'uti'n, kkesaj na ri' ronojel ri ratz'yaq, ch'analik e utukel na kkiya' kanoq, kkitij na ri' ri uti'ojal, e kkiporoj na ri' pa ri q'aq': ¹⁷rumal rech che ri Dyos xuya chkech ri jun anima' arech kkib'ano ri jastaq che kraj ri are, arech konojel kkijach ri ukowinem ri kajawaremal chech ri jun chikop, chi k'ate' wi aretaq chi' xb'antaj ri utzij ri Dyos. ¹⁸K'atek'uri', we jun ixoq ri', are ri Nimalaj tinimit, che ktaqan pakiwi' ri e'ajawinel erech ri uwachulew».

Xchachi', xchachi', ri Nimalaj B'ab'iloni'a

18¹K'atek'uri', xinwil chi jun Anjel che kaqaj uloq chi chikaj uloq, k'o nimalaj ukowinem, e ri uwachulew sib'alaj xsaqar uwach rumal ri usaqil are'. ²K'atek'uri' ruk' jun kowlaj ch'ab'al kuraqaqej uchi': «Xchachi', xchachi', ri Nimalaj B'ab'iloni'a; ri are' xk'extajik kik'olib'al k'axtok', xokik kachoch e'itzel e etz'il taq chikop rech uwokaj. ³Rumal rech che konojel taq ri tinimit qas xkitij ri amaja' rech ri itzel umak kuk' enim ch'uti'n, e ri e'ajawinel erech ri uwachulew xemakun ruk' ri are', e ri e'ajk'ayib' erech ri uwachulew, xeq'inomar ruk' ri unimal ri are'».

Chiya'a' kan ri are'

⁴K'atek'uri', xinta chi jun ch'ab'al che kub'ij chi chikaj uloq: «;Chixel uloq chupam ri ix ixnuwinaq, chiya'a' kan ri are', arech ri ix man kk'o'ji' ta ri umak iwuk' e man koqan ta ri uch'a'k chiwij! ⁵Rumal rech che ri umak xumulij rib' chi k'a pa ri kaj, e ri Dyos xna'taj chech ri itzel taq jastaq xub'ano.

⁶Chitojo' chech chi ruk' ri upwaq: ;Chiya'a' kamul chech ri itzel taq jastaq rech ri are'! Pa ri pajb'al, jawije' xuq'ej wi ri ujastaq ri are', ;chiq'aja' kamul chech ri are'! ⁷Jeri' kiq'ej chech je' jas ri uq'inomal e ri urayinik utzalaj uk'aslemal, chiya'a' k'ax chech e chiya'a' itzel oq'ej chech! Ri are' kub'ij pa ranima': ri in, in t'uyul cho ri nimalaj tem; kuchomaj, ri in man in malka'n taj e ri in man kinch'ob' ta ri' jas ri oq'ej. ⁸Rumal k'u wa' we jastaq ri', chi xa pa jun q'ij ktzaq ri' puwi' ri k'ax: itzel ch'a'k cho ri utz'umal, ri oq'ej k'isb'al k'u'x, e ri wi'jal; e kportaj ri' rumal ri q'aq'. Rumal rech che sib'alaj ko, sib'alaj uchuq'ab' ri Ajawxel Dyos ri xb'anow q'atojtzij puwi' ri are'».

;Ayum! ;Ayum! Ri Nimalaj Tinamit

⁹Sib'alaj ke'oq na ri', kejiq'ijat na ri' rumal ri are' ri e'ajawinel erech ri uwachulew, ri e'are' che xemakun ruk' are' pa ri uq'inomal, aretaq chi' kkil na ri ub'uquwik ri usib'al uq'aq'; ¹⁰naj ketak'i' wi kan ri' chech rumal rech che kkixib'ij kib' chuwach ri k'ax kuriq ri are', e kkib'ij na ri':

;Ayum! ;Ayum! ;Ri Nimalaj Tinimit,
ri B'ab'iloni'a, ri kowlaj tinimit
xa pa jun kajb'al xb'antaj
ri q'atojtzij paw!'!

¹¹Ri e'ajk'ayib' erech ri uwachulew koq'ej na uwach ri' e keb'ison na ri' chech; ri eqa'n upam taq ri jukub', kamik ri' man k'o ta chi jun kloq'owik! ¹²Eqa'n rech q'an pwaq, rech saq pwaq, rech utzalaj taq ab'aj e rech katzintzatic taq ab'aj, eqa'n rech lino e rech kyaqtuntuj, rech xela, e rech eskarlata, eqa'n rech ronojel uwach k'ok'alaj taq che', e ronojel jastaq uwach rech marfil, ronojel jastaq uwach rech utzalaj taq che', ronojel jastaq uwach rech saq ch'ich', rech ch'ich' e rech ri saqchoq'; ¹³kanela, k'ok'alaj taq q'ayes, k'ok'alaj taq kunab'al, mirra, k'ok' q'ol, amaja', ase'ite, k'aj, triko, chikop rech eqa'n, ri chij, ri kej, jetaq ch'ich', ri loq'om patanijel e chi ri winaq wi.

¹⁴K'atek'uri', ri chaq' taq uwach che sib'alaj kurayij uwach ri awalma' ri at, chi naj xb'e wi chawech ri at; e ronojel ri nimal e ri utzil, xk'is ri' chawech ri at e man k'o ta chi jumul ri kawil uwach.

¹⁵Ri e'ajk'ayib' che xeq'inomarik ruk' weri', naj ketak'i' kan wi chech ri are' rumal rech che sib'alaj kkixej kib' ri' che ri k'ax kuriq ri are', sib'alaj koq'ej na uwach ri' e kejiq'ijat na ri' chech.

¹⁶¡Ayum! ¡Ayum! ¡Ri Nimalaj Tinimit,
Ukojom lino ratz'yaq,
kyaqtuntuj, e rech eskarlata,
kuq'uj ri q'anlaj pwaq,
ri utzalaj taq ab'aj
e ri katzintzatalaj taq ab'aj!

¹⁷Chi xa pa jun kajb'al xk'is
uwach ronojel we nimal ri'.

Ri eb'insanel taq ri jukub', ri e'are' che keb'e puwi' ri polow, ri winaq rech taq ri jukub', e konojel ri kkich'ak pwaq rumal ri polow, naj ketak'i' kan wi chech ri are', ¹⁸sib'alaj kkiraqaqej kichi' aretaq chi' xkilo ri ub'uquwik ri usib'al ri q'aq': «¿Jachin jewa' je' jas we Nimalaj Tinimit?». ¹⁹K'atek'uri', xkik'yaq ulew pa ri kijolom, kewuywutik, ke'oq'ik, kejiq'ijatik:

¡Ayum! ¡Ayum! ¡Ri Nimalaj Tinimit,
ruk' ri uk'aslemal ri unimal
xeq'inomar konojel ri eb'insanel
chech taq ri jukub'
e xa pa jun kajb'al xk'is uwach!

²⁰Ri kaj, chki'kotoq chech ri are', xoquje' ri ix che ix tyoxlaj taq winaq, ri ixtaqo'nelab', ri ix q'axal utzij ri Dyos, rumal rech che ri Dyos xub'an q'atojtzij puwi' ri are' e xub'an toq'ob' chiwech ri ix.

²¹Chi chanim, jun anjel che nimalaj ukowinem xuk'am ub'i jun ab'aj, je' jas jun nimalaj ab'aj rech jok'ib'al triko, k'atek'uri' xuk'yaq ub'i pa ri Polow e xub'ij: «Je' jas weri', chi xa pa jumul, kk'yaq na ub'ik ri Nimalaj Tinimit B'ab'iloni'a, ri are', man jumul ta chik kriqitajik».

²²Man ktataj ta chi jumul ri'
ri kiq'ojom ri kkiq'ojomaj
ri arpa e ri kib'ix ri keb'ixonik
ri kkiq'ojomaj ri su' e ri tum,
ri e'ajchakib' rech ronojel uwach chak
man kkik'ut ta chi ri' puwi' ri ab'i';
e ri uch'ab'al ri ab'aj jok'b'al triko
man ktataj ta chi jumul ri'.

²³Ri usaqil ri chajb'al
man kchuplin ta chi jumul ri' paw'i';
ri kich'ab'al ri ch'ab'ala e ri ch'ab'ali
man ktataj ta chi jumul ri'.
Rumal rech che ri e'awajk'ayib' ri at,
e'are' kanoq ri e'ajawinel
rech ri uwachulew,
k'atek'uri', ruk' ri itznic
kab'ano xe'asub' konojel ri winaq;
²⁴e ruk' ri are' xriqitaj wi ri kikik'el
ri eq'axel utzij ri Dyos,

e ri kikik'el ri etyoxlaj taq winaq
 e ri kikik'el konojel ri xekamisax
 chuwach ri uwachulew.

¡Aleluya!

¹⁹K'atek'uri', xinto je' jas jun nimalaj kajininib'al kech ejumulaj taq winaq chikaj che kkib'ij: «¡Aleluya! ri kolotajem, ri nimalaj q'ij e ri chuq'ab' rech ri Qadyos, ²rumal rech che saqalajtzi e suk' ri q'atojtzi kub'ano: sub'an q'atojtzi puwi' ri eta'matalik uwach ixoq che kech enim ch'uti'n, ri are' che xukoj ri itzelalaj ch'amil pa ri uwachulew ruk' ri itzelalaj uk'aslemal, xtojtaj uk'axel puwi' ri are' ri kikik'el ri e'upatanijel».

³K'atek'uri', kkib'ij chi jumul: «¡Aleluya! ¡Ri usib'al kaq'an chub'eq'ij chub'esaq!».

⁴E ri juwinaq kijeb' enim taq winaq e ri ekijeb' Ek'ask'oj, jupalik xeqaj che uq'ijilaxik ri Dyos che t'uyul cho ri nimalaj tem e kkib'ij: «¡Amen, Aleluya!»

⁵K'atek'uri' jun ch'ab'al xel uloq chi pa ri nimalaj tem: «Nim chiwila' wi ri Qadyos, iwonojel ri ix ixupatanijel, ri ix ri kixib'ij iwib' chuwach ri are', ri ix, ixch'uti'n e ri ix che ix nim winaq».

⁶K'atek'uri', xinto, je' jas ri kijininib'al sib'alaj winaq, jeri' je' jas kchojojik nimalaj ja', jeri' je' jas ujininib'al nimalaj kaqulja; e kkib'ij: «¡Aleluya! Rumal rech che ri Ajawxel, ri Dyos Ajaw che rech ronojel jas uwach, xokik pa ri rajawib'al. ⁷Chixki'kotoq e chja'jat iwach e nim chiwila' wi ri Dyos, rumal rech che xpe ri uk'ulanem ri Alaj Chij; e ri rixoqil sib'alaj utz uwiqik rib' xub'ano, ⁸ri are' ukojom lino ratz'yaq che sib'alaj saqapupuj». Ri lino, are ri utzalaj taq kichak ri etyoxlaj taq winaq. ⁹K'atek'uri', kub'ij chwech: «Chatz'ib'aj: etewchi'talik ri winaq che kesik'ix pa ri uk'ulanem ri Alaj Chij. We tzij ri', utzij ri Dyos e saqalaj taq tzij».

¹⁰K'atek'uri', jupalik xintzaq chuwach ri raqan chech uq'ijilaxik e ri are' kub'ij chwech: «Jayi', ri in xa in jun ajpatanijel je' jas ri at e je' jas ri e'awachalal che ko itak'al che uya'ik ri tzij chrij ri Jesus. Are ri, Dyos, rajawaxik kaq'ijilaj». K'atek'uri', ri ya'l tzij chrij ri Jesus, are ri' ri uxlab'al rech ri q'axeb'al utzij ri Dyos.

Jun saq kej

¹¹K'atek'uri', xinwilo, jaqalik ri kaj, e petinaq jun saq kej: ri jun che ukejb'em ub'i' «kojonik» e «saqalajtzi», kub'an q'atojtzi e kch'o'jin chi pa suk'il. ¹²Ri jetaq uwoq'och je' jas jun nimalaj q'aq'; cho ri ujolom k'o jujun taq ketakik chapb'al wi'; tz'ib'atalik puwi' jun b'i'aj, che xuwi ri are' etamaninaq; ¹³ri ratz'yaq ukojom, kmu'matik pa kik', ¿e ri ub'i'?: ri Utzij ri Dyos. ¹⁴Ri ewinaq rech ch'o'j chikaj, ruk' saq taq kej e ruk' lino katz'yaq che saqalajpupuj, xkiterne'b'ej ub'i ri are'. ¹⁵Pa ri uchi' kel uloq jun utzalaj ch'ich' rech ch'o'j arech ke'usoko ri man k'o ta ri qakojonik kuk'; ri are' ke'uyuq'uj na ri' ruk' jun ch'ich' ch'imi'y; ri are' ktak'i' puwi' ri yitz'b'al amaja' che rech ri nimalaj royowal ri Dyos, ri are' che Ajaw chech ronojel. ¹⁶Tz'ib'atalik jun b'i'aj cho ri ratz'yaq e cho ri raqan: Ajaw chkech ri e'ajawinel e Ajawxel chkech ri e'ajawib'.

¹⁷K'atek'uri', xinwil chi jun anjel, tak'al puwi' ri q'ij, kuraqaqej uchi' e ruk' kowlaj uch'ab'al kub'ij chkech konojel ri echikop ajuwokaj che tajin kerapap cho ri nimalaj kaj: «¡Chisa'j, chimulij iwib' che ri nimalaj Uwa'im ri Dyos! ¹⁸Kitij na ri' ri ti'j kkitij ri e'ajawinel, ri ti'j kkiti'j ri eb'insanel taq ri jukub', ri ti'j kkitij ri winaq erech ch'o'j, ri ti'j kkitij ri kej e ri winaq che kkikejb'em, ri ti'j che kkitij konojel winaq, ri e'ajaw e ri e'mokom, chi ech'uti'n winaq e chi enim taq winaq!»

¹⁹K'atek'uri', xinwil ri jun chikop e xe'inwil ri erajawinel ri uwachulew, ekachi'l ri ekiwinaq rech ch'o'j, xkimulij kib' arech kech'o'jin ruk' ri Jun che k'o chrij ri kej e kuk' ri e'uwinaq erech ch'o'j. ²⁰K'atek'uri' ri chikop xyuttajik, xoquje', ruk' ri man qastzij taj q'axal utzij ri Dyos –ri are' che upatanijel ri jun chikop, ri xub'an ri nimalaj taq jastaq e ruk' weri' xe'usub' ri winaq che xkik'am ri jun uk'utb'al ri Chikop e che xkiq'ijilaj ri uwachb'al–, k'atek'uri' ekeb' ek'aslik xek'yaq ub'i pa ri polow rech q'aq', rech asufre che sib'alaj kk'atik. ²¹Ronojel chi ri jastaq uwach; xchup uwach rumal ri ch'ich' che kel uloq pa uchi' ri Jun che ukejb'em ri jun kej, e konojel ri chikop ajuwokaj nimalaj xkitij ri kiti'ojal.

Kaq'o' lajujk'al junab'

²⁰¹K'atek'uri', xinwil chi jun anjel che kqaj uloq chi chikaj uloq, ruk'am pa uq'ab' ri ulawib'al ri Nimalaj Siwan, e jun nimalaj yutb'al. ²Xuyut ri Nimalaj Chikop, ri ojer kumatz kanoq –che are ri k'axtok', are ri Satanas– kuyut ri are' chi pa kaq'o' lajujk'al junab'. ³Kuk'yaq ub'ik pa ri Nimalaj Siwan, xutz'apij taq ri tz'apib'al, xut'iq uwi', arech katani' che kisub'xik ri siwan taq tinimit pa mil junab'. E rajawaxik ri' che ri are' kkir uloq xa pa keb' oxib' q'ij...

⁴K'atek'uri' xinwil nimalaj taq tem, xet'uyi' chuwach, e xya chkech ri q'atb'al- tzij; xoquje' xinwil ri kuxlab'al konojel ri xket kijolom rumal ri uya'ik tzij chrij ri Jesus e chrij ri Utzij ri Dyos, xe'inwil konojel ri man xkaj taj xkiq'ijilaj ri Chikop e ri uwachb'al, on ri man xkik'am ta ri uk'utb'al cho ri ukursal kipalaj on cho ri kiq'ab'; k'o chi jun kik'aslemal e xe'ajawinik ruk' ri Kristo pa kaq'o' lajujk'al junab'. ⁵Ri enik'aj kaminaqib' chik, man xekowin taj k'o chi jun kik'aslemal chi k'a kk'is na ri kaq'o' lajujk'al junab'. Wa' weri' are wa' we nab'e k'astajib'al. ⁶Utzalaj kech e etyoxlaj taq ri e'are' che e'utz'aqatil ri nab'e k'astajib'al! Ri ukab' kamikal man k'o ta ukowinem pakiwi' ri e'are', xane' echuchqajawib' rech ri Dyos e rech ri Kristo, e ke'ajawinik kaq'o' lajujk'al junab'.

Kk'is ri kaq'o' lajujk'al junab'

⁷Aretaq chi' kk'is ri kaq'o' lajujk'al junab', kkiritaj na uloq ri' ri Satanas pa ri tz'apital wi, ⁸e kb'e na ri' che kisub'uxik ri jetaq amaq' pa ri kijeb' uxkut kyaqiq' rech ri uwachulew, pa Gog e pa Magog, ke'umulij na ri' che ub'anik ri ch'o'j, ek'i ke'umulij je' jas ri sanyeb' rech ri polow, ⁹xe'aq'an puwi' ronojel ri uwachulew e xe'ok pa ri kik'olb'al ri etyoxlaj taq winaq, ri loq'alaj tinimit. K'atek'ut, jun q'aq' xjab'inik uloq pa ri kaj e xe'uchasaj chi' ri e'are'. ¹⁰K'atek'uri', ri k'axtok', ri sub'unel kech, xk'yaq ub'i pa ri polow rech q'aq' e rech asufre, jawi' k'o wi ri Chikop e ri man qastzij taj q'axel utzij ri Dyos, chila' ri' kkirij wi k'ax chi paq'ij chi chaq'ab', chub'eq'ij chub'esaq.

Ri wuj rech k'aslemal

¹¹K'atek'uri', ri in xinwil jun saq tem, che jun nimalaj tem e ri Are' t'uyul cho ri tem ri'. Ri kaj e ri uwachulew xe'animaj chuwach ri uk'olem e man xkiya ta kan jun retal k'utb'al. ¹²E xe'inwil ri kaminaqib', chi enima'q chi ech'uti'n etak'al chuwach ri jun tem, xjaq nik'aj wuj, e xjaq jun chik wuj che are wuj rech ri k'aslemal; k'atek'uri' xb'an q'atojtzij pakiwi' ri ekaminaqib' je' jas ri tz'ib'atalik pa taq ri wuj, jeri' jacha ronojel uwach ri kichak.

¹³K'atek'uri', ri polow xe'utzalij ri kaminaqib' e'uk'olom, ri kamikal e ri Hades xkitzalij ri ekaminaqib' kik'olom e chkijujunal xb'an q'atojtzij pakiwi' je' jas ri kichak. ¹⁴Ri kamikal e ri Hades xek'yaq pa ri polow rech q'aq' –wa' we polow rech q'aq' ri' are wa' ri ukab'

kamikal-. ¹⁵E jachin che man tz'ib'atal ta pa ri wuj rech k'aslemal, xk'yaq ub'i pa ri polow rech q'aq'.

Ri K'ak' Jerusalem

21¹K'atek'uri' xinwil jun k'ak' kaj, jun k'ak' uwachulew -rumal rech, che ri nab'e kaj e ri nab'e uwachulew xsach uwach e ri polow man k'o ta chik.

²E xinwil ri Tyoxlaj Tinimit, ri k'ak' Jerusalem, che kqaj uloq chi chikaj uloq, chi pa ri uk'olib'al ri Dyos; je'lik uwiqik rib' ub'anom, je' jas jun ch'ab' ali chuwach ri uch'ab' ala.

³K'atek'uri', xinta jun ch'ab'al che kub'ij chi pa ri nimalaj tem uloq: «Waral wa' ri Rachoch ri Dyos kuk' ri winaq, kk'o'ji' ri Rachoch kuk' ri e'are'; e ri e'are' e'are usiwantinimit ri' ri are' Dyos-kuk'-ri e'are', ri are' are Kidyos. ⁴Kusu' na ri' ronojel uwa'l kiwach pa ri kiwoq'och: man k'o ta chi kamikal ri'; e man k'o ta chi oq'ej ri', man k'o ta chi raqoj chi'aj ri' e man k'o ta chi jun k'ax ri', rumal rech che ri ojer uwachulew ok'owinaq chik».

⁵K'atek'uri', ri Jun che t'uyul cho ri nimalaj tem kub'ij: «Kamik kinb'an ri k'ak' uwachulew». E kub'ij: «Chatz'ib'aj: we tzij ri' xas tzij wi e saqalajtzij». ⁶Xoquje' kub'ij chwech: «B'antajinaq chik, in ri in Alfa e ri Omega, in ri in Majib'al e ri K'isb'al; ri jun che kchaqij uchi', kinya na ri' chech ri uk'iyb'al ja' rech ri k'aslemal, e xaq kinsipaj ri' chech. ⁷Are wa' ri rechb'al ri ajch'akanel winaq, e ri in, in Udyos ri', e ri are' walk'uwa'l ri'. ⁸K'atek'uri', ri kkixib'ij kib', ri man k'o ta kikojonik, ri k'o itzelalaj kik'aslemal, ri ekamisanelab', ri kemakun ruk' ixoq achi, ri e'ajitzab', ri kkiq'ijilaj ri jo's taq dyos e konojel ri ejo's taq winaq, k'o ri' ri kechb'al pa ri polow rech q'aq' e rech asufre: wa' weri', are wa' ri ukab' kamikal».

Ri rixoqil ri alaj Chij

⁹K'atek'uri', jun chkech ri ewuqub' anjelib', ri kkik'am ri wuqub' pajb'al amaja' che nojinaq che ri wuqub' k'isb'al taq k'ax, xpetik e xub'ij chwech: «Tasa'j uloq, ri in kink'ut na chawach ri Uch'ab', ri Rixoqil ri Alaj Chij».

¹⁰Xinuk'am ub'ik puwi' jun nimalaj juyub' xaq pa ri wuxlab'al e xuk'ut chnuwach ri tyoxlaj tinamit, ri Jerusalem, che kqaj uloq chikaj, chi pa ri uk'olib'al ri Dyos, ¹¹ruk'am ri uq'ijil ri Dyos: Kjuluwik je' jas jun Utzalaj ab'aj, je' jas ri katzintzatikilaj jaspe.

¹²K'o jun nimalaj utapiyil che k'o kab'lajuj rokib'al, e chunaqaj taq ri uchi'ja ek'o kab'lajuj anjelib' e tz'ib'atal nik'aj b'i'aj; che are kib'i' ri ekab'lajuj juq'at kech ri e'uwinaq ri Isra'el; ¹³pa ri relb'al q'ij k'o oxib' uchi'ja, pa ri rikyaq'ab' ri relb'al q'ij k'o oxib' uchi' ja; pa ri umox relb'al q'ij k'o oxib' uchi'ja; pa ri uqajib'al ri q'ij k'o oxib' uchi'ja. ¹⁴Ri utapiyil ri tinimit k'o puwi' kab'lajuj ab'aj che are utikb'alil, chuwach ronojel taq ri ab'aj k'o jun b'i'aj che kech ri ekab'lajuj e'utaqo'nelab' ri Alaj Chij.

¹⁵Ri jun che tajin kub'ij weri' chwech, k'o jun etab'al ruk', jun aj che q'analaj pwaq, arech kretaj ri tinimit, kretaj ri uchi' taq ja e ri utapiyil; ¹⁶we tinimit ri' k'o kijeb' utzaltmal: ri raqan junam ruk' ri uwach. Xretaj ri are' ruk' jun aj e we tinimit ri' kretaj kab'lajuj mil estadi'os ri raqan junam ruk' ri uwach e ruk' ri unimal. ¹⁷K'atek'uri' xretaj ri utapiyil e xub'an jun o'k'al kawinaq kijeb' xk'ab' -Ri anjel xretaj ruk' jun etab'al che xas retb'al winaq-.

¹⁸We utapiyil, b'anom ruk' jaspaya, ri tinimit b'anom ruk' ch'ajch'ojalaj q'analaj pwaq che kjunamitaj ruk' ri katzintzatalaj ab'aj. ¹⁹Ri jetaq ab'aj che utikib'alil ri utapiyil, k'o puwi' nik'aj utzalaj taq ab'aj: ri nab'e upaja, jaspaya upam, ri ukab' safiro upam, ri urox

kalsedoni'a upam, ri ukaj esmeralda, ²⁰ri uro' sardonika, ri uwaq kornalina, ri uwuq krisolita, ri uwajxaq b'erilo, ri ub'elej topasi'o, ri ulajuj krisoprassa, ri uju'lajuj jasinto upam, ri ukab'lajuj amatista upam. ²¹K'atek'uri', ri kab'lajuj uchi'ja kab'lajuj taq perlas, chjujunal chkech ri uchi' taq ja b'anom ruk' xaq jun perla; ri uk'ayib'al ri tinimit b'anom ruk' q'analaj pwaq che man xolom taj, ktzin- tzatik upam je' jas ri kristal.

²²K'atek'uri', man xinwil ta jun Rachoch ri Dyos chupam; rumal rech che ri Ajawxel, ri Dyos Ajaw chech ronojel jas uwach, are Are' ri Rachoch ri Dyos xoquje' are Rachoch ri Dyos ri Alaj Chij. ²³Ri tinimit man kraj taj, man rajawaxik ta chech ri unikb'al ri q'ij e ri unikb'al ri ik', rumal rech che ri uq'ij ri Dyos kchuplin puwi' e ri Alaj Chij are jun uchajb'al. ²⁴Ri winaq keb'in ri' chuxe' ri usaqil, e ri e'ajawinel rech ri uwachulew kkik'am na uloq ri' chech ri kiq'inomal. ²⁵Ri jetaq rokib'al, jaqalik ri' kkanajik kan pa Q'ij -rumal rech che man k'o ta chaq'ab' ri' chila'- ²⁶k'atek'uri', kkik'am na uloq ri' ri kiq'inomal e ri kinimal ri e'amaq'. ²⁷Jun tz'ajtajinaq uwach jastaq man kkowin ta ri' kok chupam, xoquje' man ke'ok ta ri' ri kkib'an ri jo's taq jastaq e ri itzel taq jastaq. Xuwi ke'ok ri' ri e'are' ri tz'ib'atal ri kib'i pa ri uwuj ri uk'aslemal ri Alaj Chij.

22¹K'atek'uri', ri anjel xuk'ut chnuwach ri nima' rech ri k'aslemal, ktzintzatic je' jas ri kristal, kb'ulb'at uloq pa ri nimalaj utem ri Dyos e pa ri utem ri Alaj Chij. ²Pa ri unik'yajal ri k'ayib'al; pa ri jun ch'aqap e pa ri jun chik ch'aqap chech ri nima', k'o jetaq che' rech k'aslemal, che kewachin kab'lajuj mul, jumul chjujunal ik'; e ri uxaq kkowin che kekunaxik ri man k'o ta ri qakojonik kuk'.

³E man k'o ta jun jas uwach chik che kajawaxik itzel chech; ri nimalaj tem rech ri Dyos e ri Alaj Chij sib'alaj utz ri' ri ukanajik pa ri tinimit, e kkiq'ijilaj na ri' ri e'upatanijel ri Dyos; ⁴kkil na ri' ri uwachb'al, k'atek'uri', ri ub'i' tz'ib'atal ri' cho ri ukursal kipalaj. ⁵Man k'o ta chi jumul chaq'ab' ri'; man kkaj ta chi saqil ri', man kkaj ta q'ij ri' arech k'o kichaj, rumal rech che ri Ajawxel Dyos kchuplin ri' pakiwi' e ri e'are' ke'ajawinik ri' chub'eq'ij chub'esaq.

⁶K'atek'uri' kub'ij chwech: «Wa' we tzij ri' chi qastzij wa' e saqalajtzij; ri Ajawxel Dyos, che kuya ri Ruxlab'al chkech ri eq'axel taq utzij, utaqom ri anjel rech Are' arech kuk'ut chkiwach ri e'upatanijel ri jastaq che kpe na ri' chi ukamik.

⁷Chi kamik ri', ri in kinpe chi na jumul! Sib'alaj utz ri' ri are' ri kk'olow taq ri utzij we q'axeb'al utzij ri Dyos k'o pa we wuj ri'»: ⁸In ri in Axwan, ri xinilowik e ri xintowik ronojel weri'; aretaq chi' xk'is ronojel weri', xintzaq chuwach taq ri raqan ri Anjel ri xk'utu w chnuwach ronojel we jastaq ri' arech kinq'ijilaj ri are'. ⁹K'atek'ut, ri are' kub'ij chwech: «Jayi', ri in, in jun patanijel je' jas ri at, e in jun je' jas ri e'awachalal ri eq'axal taq utzij ri Dyos, in jun je' jas ri e'are' che kkik'ol ri tzij k'o pa we wuj ri'; are ri Dyos rajawaxik kq'ijilaxik».

¹⁰K'atek'uri', kub'ij chwech: «Mak'u' b'a' we tzij rech q'axeb'al utzij ri Dyos k'o pa we wuj ri', rumal rech che xas ukamik ri' kopanik ri kajb'al. ¹¹Ri ajmakunel winaq chi chmakunoq e ri tz'ajtajinaq winaq xas chutz'aja' na rib'; ri are' che k'o jun utzalaj uk'aslemal xas chkanajoq pa ri utzil, e ri tyoxlaj winaq, chi chutyoxrisaj na rib'.

¹²Chi kamik ri', ri in kinpe chi na jumul, e xas wuk'am uloq wuk' ri tojb'al kech konojel winaq rumal ri kichak. ¹³In ri in Alfa e ri in Omega, ri Umajib'alil e in ri Uk'isb'alil; in ri in Uwinqil Jolom, in ri in Uk'isb'alil.

¹⁴E'utzalaj ri' ri e'are' ri kkich'aj na ri katz'yaq; ri e'are' ri' k'o ri' kuk' ri che' rech ri k'aslemal e kekowin ri' ke'ok pa ri tinimit pa taq ri uchi' taq ja. ¹⁵Chi'el ub'ik ri etz'i', ri e'ajitab', ri etz'ajtajinaqalaj taq winaq, ri ekamisanelab', ri kkiq'ijilaj ri jo's taq dyos e konojel ri utz kkilo e kkib'an ri itzel».

Ri in, ri in Jesus

¹⁶Ri in, ri in Jesus, nutaqom ub'i ri anjel che wech in, arech kub'ij weri' chiwech puwi' ri Ekomon Tyox. In ri in rab' ri rija'lil ri David, ri utzalaj ch'imil rech ri aq'ab'il.

¹⁷Ri Uxlab'al e ri Ixoqilal kkib'ij: «¡Tasa'j uloq!». E ri katowik, chub'ij b'a': «¡Tasa'j uloq!». E ri kchaqij uchi', chuk'ama' b'a' ri ja' rech ri k'aslemal, e ri jun che kraj, chuk'ama' b'a' ri ja' che xa sipam chech.

¹⁸Ri in, kinb'ij chkech konojel ri ketow we tzij q'axeb'al utzij ri Dyos che k'o pa we wuj ri': «¡Ri jun che kukoj chi na ukoq jun tzij chik, ri Dyos kukoj na ri' puwi' ri jetaq k'ax che kub'ij we wuj ri'! ¹⁹K'atek'uri', ri jun che kuk'am ub'i jun tzij che rech we q'axeb'al utzij ri Dyos ri', ri Dyos, kuk'am ub'i ri' ri ch'aqap che rech ri are' pa ri jun che' rech ri k'aslemal e ri jun ch'aqap ¡che rech ri are' pa ri Tyoxlaj Tinimit, che cholem ub'ixik pa we wuj ri'!».

²⁰Ri in, che kinya saqalajtzij puwi' we tzij ri', ri in kinb'ij: «¡Je' nak'ut, chi ukamik kinpe in!».

¡Amen, Tasa'j uloq Ajawxel Jesus!

²¹¡Ri utzalaj usipanik ri Jesus, chk'oji' b'a' iwuk' iwonojel! ¡Amen!